

國
朝
文
匯

國朝文匯乙集目錄

卷五十二

王芑孫 字念豐號鴻甫江蘇武洲人乾隆戊申召武舉人官華亭縣教諭有湖雅堂集

轉殿私議

一

雪杖山人詩序

五

王孟公詩序

六

送秦小峴監司浙江序

六

十一世祖靜樂公兄弟畫像書後

七

故明二楊將軍傳

八

壽先生傳

十

華亭二布衣傳

十一

嘉善縣學生袁君墓誌銘

十二

張烈婦墓誌銘

十三

高澗然 字雨農福建光澤人乾隆戊申舉人官內閣中書有文集未見

春秋釋經自序

十五

梁茵林中丞退庵文存序

十五

舒

位字立人號鏡雲順天大興人乾隆戊申舉人著有歐水齋雜題

康海論

十七

與陳雲伯論海運書

十七

與陳孟楷秀才書

十八

求心錄序

十九

書孫督師撫秦四錄序後

十九

張士元

字翰室號蟻江江蘇東洋人乾隆戊申舉人有嘉樹山齋集

史論一

二十一

復社姓名錄序

二十一

錢樞升傳

二十二

汪廷珍

號姑庵江蘇山陽人乾隆己酉一甲二名進士官至鴻臚大學士禮部尚書文獻

實心藏銘并序

二十三

劉鳳詒

字丞牧號金門江西萍鄉人乾隆己酉一甲三名進士官至吏部左侍郎如太子少保著有存悔齋集

萍邑興賢莊記

二十四

个園記

二十四

萬節婦傳

二十四

鄧孝子傳

二十五

張經田

字立山湖南湘潭人乾隆四十六年進官至貴陽兵備道有無所往舟楫羊

自度說

二十七

國朝文匯乙集卷五十二

轉般私議

王世孫

古之漕法四。一河運。一陸運。一海運。一轉般。河運陸運隨世不同。海運用之元明數十年間。惟轉般自魏隋以迄唐宋。幾及千年。其用差久而其源始於高資。實虞夏聖人之遺法也。三代封建之世。納粟止於甸服。轉輸不過數百里。故經傳不詳其法。秦漢所漕於京師者無多。故講之亦畧。自後魏之世。經畧江淮。有司請於水運之次。隨便置倉。小平石門白馬津漳滏黑水濟州陳郡大梁凡八所。各立郡閭。每軍國有需。應機漕引。此轉般倉所從朔也。隋開皇三年。詔於蒲陝鄭許等州水次置募運米丁。又於衛洛陝華諸州各置倉。轉相灌注。此轉般立名之所自出也。唐都長安。江淮漕米至東都。輸含嘉倉。開元中。裴耀卿請於河口置武牢倉。望縣置洛口倉。使江南之舟不入黃河。黃河之舟不入洛口。而河陽柏崖太原永豐渭南諸倉。節級轉運。水通則舟行。水淺則儲倉以待。最後如其說行之。果便。及劉晏為轉運使。以江汴河渭水力不同。各隨便宜。緣水置倉。轉相授受。大率江南之運積揚州。汴河之運積河陰。河船之運積渭口。渭船之運太倉。此唐一代轉般之大畧也。宋都大梁。有四河以通漕。曰汴河。曰黃河。曰惠民河。曰廣濟河。其後黃河路斷。祇漕三河。江淮上供米。轉運使

以本路綱輸真楚泗州轉般倉兼以載鹽運畢則舟還其郡卒還其家汴州詣轉般倉運米輸京師歲摺運者四舟卒得番休而汴船不涉江無覆溺之患其後稍廢發運使許元奏請諸路增船載米輸轉般倉如故熙甯二年薛向請募客舟與官舟分運互相檢察吳充請減江淮米二百萬石令發運使易輕貨二百萬計五年可得緡錢千萬轉儲三路平糶備邊王安石因請令米貴州郡折錢變為輕貨儲之河東陝西便要州軍用常平法以時糶糶初天下轉般倉自歲運京師外諸倉皆有餘蓋州郡告缺則折收上價謂之額斛因加本額以倉儲代輸京師復於豐熟處所以中價收糶投賤則官糶飢歉則納錢民以為使本錢歲增兵食有餘此宋一代轉般之大畧也至徽宗崇甯時蔡京為相用胡師文為發運使以糶本數百萬充獻而轉般之儲積已罄未而以舟船送花石綱而轉般之船亦壞於是尸部尚書曾廣孝建議以轉般法畝令六路歲供直送京師號為直達綱而轉般之倉遂廢法無有弗弊者也其人存則其政舉以歷世相傳轉般之法蔡京一小人壞之而有餘其後改為直達而京又壞之嗚呼開國承家小人勿用豈獨漕法然哉方今民困於浮收官困於幫費議者莫不欲去浮收以救民去幫費以救官然去浮收必先去幫費去幫費必先改漕法今之漕艘古所謂直達綱漕之善者也願國家承平百六十年法久弊也

老奸宿蠹窟穴其中。通倉之需索。大累於幫丁。幫丁之需索。大累於州縣。督撫以浮收暫紓州縣。而州縣卒未嘗紓也。漕臣以幫費暫恤疲丁。而疲丁卒未嘗恤也。通倉諸臣奮然欲去經紀花戶之需索。而卒未嘗去也。經紀花戶之盤踞於通倉者。不得去。則尖丁之蠶食於州縣者。不能除。浮收歲甚。幫費歲增。幫費愈增。浮收愈甚。於是。有書役之挾制。有紳士之包攬。昔之浮收利於官。今之浮收害於官。岌岌乎勢且不終日。而道窮矣。窮則變。變則通。自漢唐以來。由轉般而之直達。何不可自直達而之轉般。變之所極。其機自坐。近歲駁船之設。始為偶行。繼成常例。不得已隨地置倉。由是而天津有倉矣。臨清又有倉矣。是轉般之法。雖未顯立其名。實已用之於北也。今築禦黃壩。恐誤江廣回空。即就清江增船駁運。是轉般之法。又已用之於南也。日菴

救下諸臣。別籌河漕兩利之策。伏繹 詔旨。似專為河工未就而言。竊以河工天事也。患之偶也。幫費人事也。患之常也。天事無往不復。人事有加靡已。就使一旦河流循軌。漕艘暢行。而幫費日增。漕弊日出。是上以百萬金錢治河。下又以百萬金錢治漕也。治河而平。而費止。治漕漕在。而費無終窮。何不酌古之制。權今所宜。取唐宋轉般倉成法。損益之。不泥其迹。而師其意。古稱利不百不變法。轉般之在今日。豈徒利百已哉。今欲行之。其要有五。一曰易漕艘。漕艘之建造修葺。一切應得分例。有經

常有額外所廢於國帑者數十百萬及其出運凡所勒索於州縣者又數十百萬日行不數里催趨迎提終年勞擾近者火帶愈多雖蘇松內河無歲不駁運夫所利於漕艘者利其直達也今不啻用無數小舟自水次零星駁送抵通其駁送仍責舟於沿途甚至攔江索錢奪船毀器患苦商民抗違官長倚天庾為口實援漕督為護符文武吏士莫能彈壓不知漕船亦何效於國家而相顧咨嗟莫敢議去今行轉般之法一艘之費可得數十駁船一丁之費可儲數十百天一銜職之費足資文武官數焉夫何憚而不為或曰漕艘之受多駁船之受少未免終年僕僕是固然也然船多則不嫌其受少官有番休則雖勤而弗病奚患焉又况裁編巨舸橫截中流習慣承平第見其便設遇倉猝勢如連雞有可虞而無可恃今其不戒於火者往往一時俱燬豈非明驗乎受少則損失亦少受多則覆溺亦多吾未見龍驤萬斛之勝於蚱蜢者也然則如之何而去之曰以漸去之此時草創駁船未具姑藉其舟就近浮送嗣後應修者勿修而變其直以半酌丁官收其半以造駁船不過數年漕艘漸少駁船漸多久之漕艘盡而吾船具矣二曰建倉唐宋置倉各就所都道里遠近疏密不等今天津有倉臨清有倉獨臨清以南尚未建造中間層遞措置郵程較遠宜擇河北寬平之地或濟甯台莊或別就有城郭有道員駐劄之處更善添設清江浦已

設駁船然地當清黃交會不無水患未便置倉唐宋皆置倉真州今或仿其意就沿江瓜儀一帶設之近年清水泛溢五瀾時開誠恐淮揚溜急江廣巨艦沂流匪易置之瓜儀附近一以速江廣之回空一以便江浙之調賑三曰造撥船江廣船由長江而下風帆甚利或姑可仍舊其餘置倉之處即為增船之處船裝以及歲修年限各隨其地畧用劉晏河船不入汴汴船不入渭之意往來層折遠受其船人亦各就所在募充前此漕艘水工僱之沿路皆飢寒窮困之徒為盜賊逋逃之數或慮漕艘不至流離無著激其為變此又似是而非也有倉之處需人矣有船之處又需人矣猶是役也猶是達也食力者何之不可而况昔之漕艘過境僅在一時今之駁船來往轉須卒歲漕艘之所僱者暫州縣之所役者常彼其去短工而就常役較前為樂至於盜賊逋逃則僱之旗丁者莫紀錄來役之州縣者必存名籍而又何亂之能為哉四曰判職掌置倉所在文武分職以典其凡役事遺漢科道二人莅之其體制畧如巡漕汎舟之役文武分頭幹當科道必躬自檢察二人更番一人出則一人歸出者治運事卻勒其程期於米之必去歸者治倉事勾稽其數導其米之過來呼吸相應首尾聯絡其下往來趨事需員孔多文職自同知武職自都司以下悉聽調發有不如指許以柱後惠文從事獨不得調州縣印官所遺科道依督學之例督撫密

陳其賢督撫有闕失亦得糾舉之。三年代遷錄其下幹當各官勤惰以上於吏兵二部。點陟登下之。五曰優俸。文武吏以若府史胥徒身家所託在於官中。吾不有與之。彼必有取之。勢所固然。而非必其人之不肖也。劉晏造轉運船。每一船破錢千。費實費不及五百。或問之。晏曰。大國不可以小道理。船場既興。執事者非一。必有餘剩。養活衆人。私用不寬。則官物牢固。乃於揚子。縣置十船場。差專知官十人。不數年。皆致富。贈公私兼利。其後吳克卿為揚子縣官。始勸會物料。實數估給。專主官十家。即時凍餒。而船場敗壞。饋運莫繼。今欲寬其官程。恤其私計。勢必萬萬不能。何也。假而建倉。則建倉之費必咨部。而部曰。核實。假而造船。則造船之費必咨部。而部又曰。核實。核實云者。部臣又不得而主之也。書辨曰。可。部臣莫敢曰。不可。書辨曰。不可。部臣莫敢曰。可。由是而若者。核減若者。核銷。亦恣取部費而已矣。州縣百方欺隱。而外有上房。內有部辦。監其腦而食之。往往枉承欺隱之名。卻受賠償之費。又安望餘利。顧及身家也哉。我國家養廉之制。原為杜截欺隱。聽其隱取。不若明與之也。然今之得有養廉者。誰乎。非惟無得而已。其捐廉項下。每歲追呼。少或數倍。多或數十倍。然則陰取之者。隱奪之。明與之者。又明奪之。官吏將不為惡。而何為焉。竊願當事者。身劉晏之餘聞。感東坡之極論。嚴其為惡之禁。必寬其為善之途。各按所職。高

下劇易為之差次其等官則豐其無好之頑役亦優其代耕之祿務從寬大規其久遠焉於是則衛藉可除矣。旗丁亦民耳。號之為軍。在明初有屯田以贖其身家有番代以均其勞逸教之弓矢生作以寓兵於饋饌之中。良法美意皆備之矣。徒存此不農不賈之兵領之於非文非武之官以為軍冗軍也以為民游民也。莫愛而勿去也。誠使轉般法行舉其籍而削之便。或曰旗丁有身家故責之濫事去之又使何人應募不幸賂補將奚取諸。此正不然。旗丁之有家者固未嘗出運也。其出運皆奸猾耳。去之又何人不可應募。今各省委員之採辦其亦給力於旗丁耶。惟其賈賂於丁主之而官無權官為虛設委責賂於官則官任之而官自出其精神矣。或曰旗丁託業於是幾百年矣不願去奈何。曰無不願其富貴者以軍籍為恥其貧賤者以軍籍為累一旦脫籍方且幸甚。惟一二奸猾則託業焉彼固非託業於丁乃託業於凶橫也。為政者豈有聽民以凶橫自業者乎。誠令凶橫者失業而富貴貧賤各適其常豈不快哉。或曰屯田在丁久矣將歸其田乎不歸其田乎。曰七省之屯田多寡不同風土亦異各就所在區處田有可歸歸之不可歸或量徵所入或別與他徭或即用此田之人供我轉般之用不必固是以求益於國也。要之丁籍去而所省已不貲矣。於是則衛官可裁矣。衛守備衛千總猶之營守備營千總也。今以不堪營用者再之

衛職其人自知升進無階聊復姦於其間哥衣食焉徵糧理訟小分州縣之權裹帶肩輿畧無騎射之責隸之糧道而糧道相懸數百里也帥之漕督而漕督相懸數千里也不得已仍屬之所在知府而知府究以武職外之平時既無考核出運又藉鑽營其强者與奸丁為狼狽其弱者為丁眾所欺凌所謂尖丁者輒倒持其柄而退避之天下冗官無過於是其職而併之州縣使於是而漕督可省矣漕務綿亘七省漕督一人僅駐一處呼應既有不靈稽查亦所難遍居恒坐嘯雖賢者無由自異及其出運鞭長莫及故又佐之以巡漕名為漕所總匯其實下無不由於州縣上無不歸於督撫漕之誤與不誤仍在督撫州縣總漕無能為也督撫州縣皆非誤漕之人總漕一官設可也不設可也蓋漕督位尊濶絕衛官衛丁聽命於其衙門書辦凡衛官之出運非賂莫得也衛丁受兌之水次非賂莫得也衛官衛丁必先馬貨以得之而後取償於州縣所出之幫費半入於衛丁半分於書辦而且衛官衛丁得之勞書辦得之逸矣夫多一總漕無裨於漕猶無損於漕多一總漕之衙門非惟無裨又有大害皆此類也漕軍國重事固宜有兵將護明制所為設立衛官衛丁也衛官皆守備千總奚為而不教練衛丁皆軍籍奚為而不習藝今以其人輒落袍懸又更設漕標之兵是重疊也總漕既省分其軍於建倉處所用衛倉儲庶幾予於是而災賑可

備也。唐宋轉般之法。歲款則請停所運三之一。或三之二。於災荒處所減價糶之。又於豐熟處所中價收之。以運運額。或米貴則令民折納。穀賤則以其錢糶米還倉。其事亦猶今之截漕也。而國民兩利。設有倉猝意外。就近饒軍。為力省而濟用亦速。於是而懋運可兼也。京師百物。仰給漕艘之夾帶。其過關也。憑陵關吏。莫可誰何。其過境也。苛役州縣。代為起駁。沿路已攤。亦沿路脫卸。故其夾帶之貨。多於額裝之米。今漕艘既不抵通。誠恐九衢市價騰踊。唐之轉般。粟帛兼運。且有輕貨之齎。宋六路上供。東南茶布。亦在其間。或官為置本而收其息。或聽商搭載而稅其舟。然稅於舟者。勿更稅於關。前此漕艘水工。例帶私貨。今亦勿禁。如此亦何患其不奔轉而闌溢矣。凡此數端。粗陳大指。若其審時度地。消息盈虛。當官之要。毋煩俚指。古后王作則。莫不周復其終始。與後人以不改。或垂之三世。五世。十世。其運量遠矣。卒未有五百年不變者也。漢之代田。不用於唐。唐之府兵。不行於宋。安在漕運之必沿明舊而承其弊哉。今之君子。因循朝夕。方將河漢斯言。有起而任其責者乎。雖然。今即不行。後必有行之。第恐彌遲。其失彌甚。貽悔後時。如蘇洵所稱。不幸而獲知言之名。已爾。

雪杖山人詩序

芑孫之少也。猶及見長水鄭誠齋善。善在當時。自文章盛名。而未始知其有從

兄雪杖山人。及是山人之子師尚年七十餘矣。不遠千里。寄山人詩求序。余不識山人。徵于稱山人者。則曰。山人以疏狂負累。世俗既窮。以死其生。平悲憂愉悻。嬉笑怒罵。一發於詩。淋漓在紙。余讀其詩。信然。然狂簡之說。發自聖門。古狂今狂。流連寤歎。聖人蓋嘗求狂焉。而莫可得也。晚近俗媮。不狂者入焉。而以為狂。于凡束修砥行之士。弗苟隨俗為佞仰。俗必病之。然雖病之。欲毛舉其過。而無可舉也。即一切以狂加之。余觀自古文章。若李杜韓蘇。未有不狂。而能成焉者。驗諸並世名狂之士。縱或其人。歎歎僕瀉。未有不較勝于俗者。然則山人雖不識。余固以識山人矣。山人詩出入于昌谷山谷。賅孕既博。取徑生奧。當其得意。往往輪囷離奇。譎幻不可方物。去人絕遠。宜乎世之相與狂山人。山人亦庶幾克副其名。而無媿焉。已述世之所以相與併力狂山人。不過欲困山人以窮且死。贊善在當時。亦以能文章不善佞仰。任不遂。然狂差不逮。故俗猶羨其過。差勝今日者。山人往矣。贊善亦往矣。所為差勝者安在。而且山人之詩。轉先贊善以行於世。匪特師尚之篤思前美。追孝可稱。即前時相與併力以狂山人者。何啻非併力以張山人也哉。余世所稱狂者。徒也。蓋嘗深惟其義。怛倪焉。而不敢承。故于山人發之。而直亦以狂加之。為山人任其名。使夫隨俗佞仰者之欲覩于是。而弗得也。

王孟公詩序

余為華亭校官。以詩古文求士。日惘惘無所嚮。意外從他人扇頭請王孟公詩。誰何之曰。此華亭生也。余大驚。歸檢諸生之籍。無孟公名。然後知孟公以老病去。諸生久矣。孟公所居。邈遠在東門外。不得往。乃問以書。孟公亦久病。養足不克來。以詩報余。其詩多生與拙澀之趣。縱未知與古作者何如。要力期于自立。不困循。則固峴然非靡靡者之所書。志及矣。明年孟公強起過余。寒敕困衰。而健談善論事。眉宇意氣之間。可想見少年精悍時。探其中。有耿耿老大不能者。余用是歎孟公之不同俗。微獨在詩。惜無有人焉。及其少年精悍。以矯厲於揚之。乃俾坐老天涯海角。併一區區諸生之籍。而亦涕唾之與俱遺也。頃之余解職去。又四年。孟公歿于里。其里人刻其詩。謂余知孟公。寄余求序。自古窮鄉僻壤。不得志之士。必有一二鉅人長德。激昂其間。因以出聞于世。其或不聞于世。而篇章姓字。無致泯絕。僅垂于後。猶足以興起方來。而慰安其所未及見知者。晚近之所謂鉅人長德。其用意或殊焉。往往務為苟同。閤閤凡子。熟所習憤。偶見夫一二翹然自異者。則不問是否。相與非笑而共嗤罵之。烏庠。此其流失敗壞。蓋又不獨柳東為然。故余于柳東所接士之牢落而不振者。苟一行足盡一辭。可紀。咸載其姓名。以著之天下。夫以余之寡德。渺聞。又非徒揚子雲所

稱祿位容貌為世所忽易。自審亦誠無繇以張之也。願於序孟公詩。有賤然其不容。終已者雖然。此豈直為孟公輩已哉。

送秦小岷監司浙江序

秦君小岷每一遷官。予輒數日喜。及是為監司浙江將別。予私獨悄然于心。未敢語人也。一日介休劉舍人錫五過予。言小岷去吾儕自此孰與遊從矣。復相對悄然者久之。凡今仕于朝。莫不以外達為樂。蓋國家監前代之弊。制內外官不相輕重。而

上方以功名磨厲一世。于士之賢有能者。類不欲以文學侍從盡其用。使得治民。以故唐宋士。非不得已。莫肯已外。今者雖交游親懿。莫不為之願而賀焉。亦各遺其勢。而然耶。彼其為之願而賀焉者。非幸其祿入之豐。儀衛之盛。走趨唯諾之嚴。且眾也。亦謂文學侍從。取充員位。監司郡守。專制一方。有古諸侯連帥之地。其喜怒吏民所竦動。其取舍婦孺所誦傳。有所舉廢。常必行。有所激勸。常必效。有所咨謀風議。于大府之前。常足為一時利害。士大夫讀書志古之道。際世承平。所能紓十于一。于千百者。惟此而已。然則小岷之去。固吾道之尤幸。而尤願之者。而予與舍人相對悄然何哉。徒以小岷質靜而有文。寬平而無欲。其處已介。而與人忠。以朋友為性命。予與舍人

方拓落無聊獨幸以志業之同見取于君有過相規有得相告有事也相扶將有憂也相慰勉君在則有以為驥君去則無與為質人之情大率驥近而志遠樂其便于己而不恤其道之不行雖一交遊離合間有不能權輕重而自克其私如此雖然君在則遊從之樂吾儕私有之而君無所博其道君去則所施也博矣而拓落無聊之憾乃獨在于吾儕以予之窮于世其得君而驥失君而悲也宜無足怪而舍人亦然則夫無驥近而志遠者之難也樂其便于己而不恤其道之不行者雖君子有時而不免也乃書其語以與小峴別吾知小峴之予浙也其與人忠也不驥近而志乎遠也其處己介也不樂其于己便而日恤其道之不行也

十一世祖靜樂公兄弟畫像書後

嘉慶三年四月亡弟翼孫 賜葬之期族人皆來會葬于是族祖晚聲先生世鈞敬奉十一世祖靜樂公與伯兄公榮仲兄以潤二公合寫遺像卷以示邑孫且命著語其後邑孫不規斯像蓋將三十年矣邑孫年十五實從先大父于松江晚聲先生寄此卷欲求沈先生德潛為題記時沈年為老先大父難為讀乃自擬其辭而屬門下士宋綸邦書之今卷中沈迹非沈先生筆也惟吾家自宋南渡居吳縣洞庭東山始微不見至靜樂公發迹任宦及文恪公而始大自天順己卯畫像之歲越百八十有

五年而大清受命。又百五十有五年而逮于今茲。微獨君子之澤數更再遠。卽傳所謂十世有之者。又已過期。然且松楸無恙。廟貌依然。子子孫孫。死生相保。聚吉凶相弔賀。請書從仕。未致頽絕。自非孝友純懿。有積于家。有報于國。有信于鬼神。其何以及是。夫非孝友純懿。之有積焉。則無以為久。非有奇傑魁壘。出而建當世之業。伏而修先儒之懿。沒而垂後世之傳。則無以為大。不久則無以延其世。不大則無以存其世。司馬氏自程伯休父始。大及逮。作自序。而其世以存。班氏自令尹子文始。大及固。作叙傳。而其世以存。以今日士大夫觀之。若宋之范文正。有文程者出。而范以再顯。陳之顧野王。元之黃文庭。有文武宗義者出。而顧與黃亦再顯。連固位不削。德文程位宰相。而宗義文武皆無官。其為能大而存其世一也。十日十二子相妣。數窮則始。不始將無以為之繼。吾家于是積世餘四百年。靜樂三公之子孫千餘人。是亦數窮理極之時也。宜將有所謂奇傑魁壘者。奮然出乎其間。然後可以扶其衰而起其墜。而果有人焉乎。其無有人焉乎。懼先人之澤。且自茲而墜也。其興也。歸于孝友純懿。其墜也。必歸于父弟字厥子。子弟祇厥父。兄弟友厥弟。弟弟恭厥兄。而因以施諸夫婦朋友。婚姻交際。百為無之。而弗泯。嗚呼。伊古以來。衰盛相尋。其興也勃焉。必有所以興。非勃焉也。其亡也忽焉。必有所以亡。非忽焉也。已孫瞻拜遺像。俛仰旁皇。嗟

思在昔有不勝其憂且懼不敢不書其說以告後之人是歲六月五日十一世孫芑孫謹書于華亭官所

故明二楊將軍傳

二楊將軍者明故右軍都督管練兵總兵事前鎮朔將軍贈太子少保楊國柱及其從子前鋒鎮中營副將都督銜賜蟒玉贈鎮國將軍楊振也楊世將家其祖與自明初以功襲廣甯後屯衛指揮使至

太宗文皇帝時明衛地皆沒于我世職徒空名于是興之後有曰國棟者以指揮使領義州春將事以故國柱振兩人少長義州國棟父應元先以勇戰死及國柱振生而尤勇義州人訛之以為一時生兩楊無敵云然兩人者皆以忠義自命齒相差倣儻恢奇相尚也已而

文皇帝取義州兩人家破倉卒走相失國柱獨身跳廣甯前屯衛而振以其父母及弟入朝鮮

振字鞠清國棟之子少時能伸左右臂立兩壯夫不墜其入朝鮮也母趙中道自絞死及太子河無舟追者至振解衣負父右挾弟左手持飯糧以渡既渡遇巨蟒立而搏人振亦搏殺之褫其皮裹腰以示勇頃之朝鮮奉

太宗約理逃人。振復脫之皮島。依毛文龍。文龍死。又脫歸甯遠。于時孫傳庭為甯前道。以謂世職子弟宜裁。擇借補營將。繇是振得試為甯遠左哨千總。稍稍收聚。又時部曲左哨一旅。皆投石超距。橫一時。臺使閔兵與諸將期射。莫能中。振喜射。所乘小青驄。又神駿。遂連登中之。願臺使不賞振。而索其騎。弗與。則中以法當斬。已反接轡門外矣。賴傳庭救之免。崇禎二年。

太宗破永平。遵化。入薄都城。傳庭以追兵勦王。振在兵中。廷議別命兵部主事邱木嘉。護陵寢于昌平。振以傳庭檄率騎五百赴之。冀日我兵風雨至。振匹馬大呼。橫衝入陣。流矢貫其頰。不反顧。五百騎者從之。短兵接呼聲。疑五六萬人。當是時。木嘉登城望見我兵。未嘗不心悸。齒上下相擊。及是持牛酒郊迎。為振拔天數。樂賀再生。然木嘉以護陵功。驟擢巡撫。而振僅加二等。違為都司。當振為都司之日。朝廷遣內寺監軍。凡精銳悉選隸監軍。有警藉其力以逃。勝則冒功。敗則誅過。將帥或反持其短長。振獨憤憤不為用。監軍者急之。又中以法坐落職。然振雖罷而國柱立功。自副將擢總宣府兵。掛鎮朔將軍印。于是巡撫方一薦。薦振復起。代國柱為前鋒鎮中營副將。前鋒鎮者。平遼將軍祖大壽也。駐錦州。素倚國柱為重。振至。一用國柱法。畧以有功。歷晉都督銜。賜蟒玉。前監軍者聞之大怒。未幾以發。會我兵圍松山。急監軍者。遵

以軍法檄振即日往。往至呂洪山。日暮。遇伏被執。先是振在皮島。與孔有德。耿仲明。尚可喜。三人善。三人者。先後歸。

太宗。皆已富貴。封王。相與言。振材勇。可因為用。遂諭降振。曰。始所與諸君約。為兄弟者。欲戮力王室耳。今諸君已負約。奈何要我相隨。為不義耶。我家食祿二百年。吾即殞生。何以見祖宗地下。諸君誠愛我者。幸早殺我。語奏。

太宗太息曰。為人臣子。不當如是耶。雖然。吾不忍殺已。而曰。振若降者。可封王。舉松山。戶口。丹之。于是以振往招諭松山城守者。未至城里許。振南向據地坐。謂從官李祿曰。為我至城下。語守將金公。我不幸敗。然各路兵且至。努力堅守。不三日。圍自解也。祿至城下。如振言。于是我兵執祿。叱曰。使若諭降。反諭守耶。振大罵。遂殺之。并殺李祿。振死無血。白氣縷縷。自項頸上。松山守者感其異。竟不下。越三日。我兵退。振妻鍾氏。求屍得之。面如生。鳥獸不敢近。李祿亦然。身首既屬。始有血津津。自口鼻間出。持而哭之。其左目瞑。既逾月。弟某至。啟棺哀慟。右目乃瞑。事聞。贈卹如明故事。

國柱字廷石。國棟少弟。而應元之子也。驍勇。亦如振。生平天不虛發。始與振相失。走之廣甯。前屯衛前屯副將張洪謨。最號知兵。以為練兵。必先擇左右哨司。哨司與士卒親。哨司不睦。即賢將無與成其功。于是以國柱補前屯右哨把總。方是時。世家子

多不屑為把總。國柱獨肯就勒所部整器械習步伐。遠斥堠。謹干柙。不肯以官卑廢法。敵小入殲之。以聞。大入則舉烽。連帥府。會師設伏。然後出。出未嘗虛還。洪謨器之。頌其法軍中。先時軍中連進罰贖。皆以首級計。國柱前後斬獲。悉讓以與軍吏之桂議者。已獨不得進。久之補千總。又久之補守備。崇禎二年。我兵大入薄都城。國柱與振皆從調。在孫傳庭勤王部中。振別守昌平。而國柱由三河石門渡白河。擊遊兵之在瀛。莫滄。沽間者。有功卒偕諸將復永平。遵化。灤州。遼安。四城。錄是國柱與振雖偏裨。一日皆名天下。已還前屯。擊滅他部之入犯者。論功進參將。俄擢前鋒鎮中營副將。是時也。我兵在廣甯。與大壽所駐錦州。隔河相望。見遊騎一過河。即入前鋒中營。沉地偵者出。輒為我得。以是大壽卒莫敢遠哨。而營將多以失事罷。國柱先度地設臺數十里外。塵起可瞭。又統精騎直抵廣甯。臨樹柵。使哨探有敵。功最多。在烈帝聞而善之。擢為宣府總兵官。特命掛鎮朔將軍印。宣府左居廣右雲中。去京師不四百里。地險且狹。國柱至。增長谷鎮。邊浮圖箭嶺之戍。留茂山衛。以護紫荆關。修季信堡。以固兩鎮。其東永甯諸城。西萬全諸衛。南之順聖。北之獨石。中路萬峪諸堡。皆特角布置。瞬息響應。流賊過秦晉蹂躪。獨不敢窺雲中。國柱力也。然是時宰相與權璫。內外交構。將帥人人不知所措。而國柱尤不為宰相所喜。中以法解印罷其鎮事。國

柱惘惘率所養敢死士歸保安新衛且屯且守會宣天總督張鳳翼創立懷標十營思得宿將曉兵法者訓練之聞國柱罷大惋惜即日拜疏請國柱以右軍都督管懷標練兵總兵事國柱既至自將領以至百十夫之長咸與指畫俾轉相統屬合千萬指如一人懷兵復強無何

文皇帝圓祖大壽於錦州急督師洪永疇赴援令國柱以銳卒先驅我兵設伏於松山待國柱過突出圍之數重承疇在後阻險不能進國柱孤軍殊死戰不知腹背所在四面呼降國柱太息謂其下曰我家義不為降將軍以辱祖父昔吾先子振遇伏於此今我不幸又蹈兩世頸血皆濺此一塊土矣嗚呼語訖躍馬復戰面中三矢身被六創以歿事聞贈陰子祠如制妻何氏盡籍所有軍實獻以佐國封一品夫人蓋振死一年而國柱繼歿又四年明亡

王芑孫曰楊氏故揚州之寶應人終明世皆在遼東入我

朝昭武將軍提事

章皇帝復以功名顯令其子孫或隸旗籍或還居揚州或散處蘇松間其在松者曰春蓋振後也示余故南昌彭厚德所為雙忠傳余因得二楊將軍始末而厚德傳傷於太繁故為刪次其事二楊之死偉矣要此非奇男子所難觀其見困於臺使監軍

以若宰相者。先後若出一轍。嗚呼。此果何為而然哉。自古人君莫不欲得人材以用之。而顧使彼瑣瑣者操其用舍。雖得奇男子。不過暴骨沙場。一死塞責。悲夫。故余大其語加詳。以俟覽者省焉。

壽先生傳

乾隆五十一年。林史文反臺灣。不旬日有眾數萬。於是隨彰化陷。鳳山所嚮如破竹。獨淡水城不下。淡水圍竹木為城。無土石。自其年十二月至明年五月。攻最久而城獨完。民不為賊。文武官莫在。惟諸暨人壽先生為之守。先生姓壽。名星。字同春。以字行。而壽先生之稱為著。以習文法。佐人治吏事。至臺灣。當是時。淡水同知潘凱前沒於生番。代者程俊。方按揭捕大甲。城中空無人。史文以其眾入。程俊子倉卒攜印走。而俊亦別戰死。先生與其輩數十人俱縛。坐堂皇下。賊故聞壽先生能識官事。顧不知孰為先生。姑一一誰何之。已乃從先生求計畫。先生曰。而屬以烏合之眾。頓兵荒城中。何以食。官軍至。聚而殲旃靡及矣。凡兵分則見強。合則示弱。而奚若。賊故搜城中無積儲。則皆曰。然。因脫先生械。留其黨守城。而自出四掠。於是壽先生客淡水久。其胥徒皆故熟習。其士民皆故信服。頤指目語。精神響答。潛紂義兵。風雨儼合。出不意。就同知廳事。駢斬留守賊三十六人。即日閉城門。為朝廷守。賊聞大駭。悉眾返攻。

先生部勒其民。日夜登陴。樵蘇既斷。發屋掘鼠。得間輒出。選鋒擊賊。有死者。明年五月。賊稍稍引卻。道路通。署同知徐夢麟始以印至。次第招安白石湖。勦洗金貂尾寨。擒叛官彭喜。夢麟諸所施為。一切倚先生為辦。是時文負嶠。據大里。伐自固。我兵環營其外。疑莫敢入。先生不勝忿。謂夢麟曰。賊介恃其眾。今日戰。明日戰。可勝殺乎。不如入也。速入取其首。餘將瓦解。夢麟以其言上書軍門。不報。三請然後得指麾。由大甲分六路進攻。先生別以若干人。由西路入。而鹿港之兵。遲延失期會。既入無援。馬蹶被獲。賊恨先生久。至是大喜。相與攢及支解之。時先生年七十有一矣。又明年。嘉勇郡王渡海。檣皮文斬京師。臺灣平。有旨贈先生知縣。蔭其子聽一官。聽令知江蘇之鹽城縣。

王芭孫曰。壽先生死十年。知婁縣張君昌運示余金匱楊措所為壽先生誄。措有筆。其叙先生死事頗詳覈。其文作於壽先生未被。詔恩時。憤當時所以議先生者太過。然先生所樹立。矚然如是矣。彼議者何人哉。其是非要勿足論也。於者令先生當附傳。國史。顧史臣戴筆。藏在秘館。世或不具見。余故因張君之請。別為私傳。俾聽副諸墓家。他日讀措文者。庶幾於余言徵信焉。

華亭二布衣傳

吳鈞字陶宰。自號曰玉田生。江蘇華亭縣人。其曾大父懋謙。以能詩有名。國初世謂之華葦山人。至是百餘年。而鈞復用布衣稱詩。鈞生平不應舉。不知家人生處所。好讀書。旁通天文句股金石篆隸刻印之術。而尤自力為詩歌古文辭。其於文好深湛之思。於詩不肯作。務自矯厲。不同俗。性介潔。時時為人教小蒙童。以食有一子三女。無完衣。所居梅花書屋。在城東委巷中。塹垣塌井。鈞處之浩然。不輒受人一錢。人亦不敢輒餽之。華亭東南瀕海大處。自明入本朝。代有聞人。文章氣節。翰墨照一世。常為天下所望。走鈞生衰絕之後。憫傷鄉先生風流墜地。文獻輟亡。迺日曳敝履。躡躡閭巷間。訪尋曩輩遺文。滄墨故紙。手自編寫。人各為傳。欲用漢唐人總集之例。悉錄當時著撰。勒成一書。以為掌故。未及成而遽卒。年五十四。鈞雖靜退。足跡不出數百里。交遊不過五六輩。無絲自發其恢奇。然既讀書。考論天人之際。究觀今古。其氣耿然不可下。又頗近酒。酒酣嘖嘖。輒以誦其坐人。人莫識也。既以窮死。縣人乃掘拾其所為。獨樹園詩。箴璞詞。各一卷。為刊板以行。鈞故寡與。獨與其同縣翁春交善。翁春字曙鳩。一字辨堂。亦字澹生。別自號石鈞。不知其家世。小時與母沈居北郭外。菜花溼挑菜自食。偶過里塾門外。里塾兒負課春為誦之。如流水。塾師怪問。則曰。願常往來。聞師教讀習之耳。指其字。初不識。春便從塾師乞問。大義歸。而以意推測。句

議無幾何。遂自能讀書。又別丐市肆棄筆。從牆壁間畫字。人以是誇說之。聞於縣貢生姚培謙。姚故以著述自名。家多藏帙。奇愛春昇。以所宜讀書。且周給之。使卒業。已而里人沈大成致之門下。講以所聞。遂能詩。於詩好元人。不言李杜。於作字好孫過庭。其為人耿介。與鈞相似。博覽感激。豪宕不如鈞。而周謹亦過之。對客清坐如木佛。寡言笑。有招之飲。靡不往。歲常拜培謙大成墓下。與其里人沈梅相交。惟餘三十年。生館其家。死殯其室。梅亦雅操士也。先時大學士諸城劉公。以侍郎督視學政。行縣聞其名。欲見之。春不可。公乃手書為卷以贈之。旁縣王侍郎。中歲假歸。禮先於春。春亦莫逆也。性篤孝。善事其母。母沈年八十餘。考終。春以嘉慶二年十二月中寒疾驟卒。年六十二。不娶。遂無子。有同產弟。不知書。於是其故人門弟子。相與葬春。并葬春母。又哀校其所為賞雨節屋詩四卷。與鈞詩偕行於世。

外史氏曰。漢儒之世。有所謂故老。悼悔者。彼其遺澤。蓋亦有繫於當時矣。余故聞沈大成學子身不遂。而以文學行義教其鄉。鈞與春及聞其緒論。猶復以布衣自表見。况乎或出而居民上者哉。青浦胡生家珊。為余言生家菜花溼。嘗以門右傍街一小樓居春母子。二十年。不常見春。蓋突有煙起。而其母猶勗春讀書勿悔。日諠諠然。然則其母亦非常母也。余來華亭。鈞已前歿。而春猶在三佳拜。春僅一見之。弗余報謁。

國朝文匯

卷五十二

十二

乙

集

國學扶輪社印

也。嗚呼！士大夫以仕宦為賢，而節概多存於窮巷堀門槁死之士。此余所為拳拳於二布衣也。

嘉善縣學生袁君墓誌銘

君諱璉，字惕三，世為浙江嘉善縣人。其始自陶莊遷之東亭，再遷趙田。君趙田之袁也。惟袁氏遠有代緒，君九世祖顥，顥生祥，祥生仁，仁生黃，黃生傑，當勝國時，咸以學行有聞。黃以萬歷進士，歷官內外，有政績。世稱了凡先生。傑亦天啟進士，為循吏。仁所著春秋考誤，經筵編二書，朝廷采擇入四庫全書。傑子廩膳生祚雍，是為君之高祖。曾祖衡，康熙丁卯舉人。祖天鯨，父性齋，縣學生。妣陳繼妣沈君，少而才敏。年十二能文。以乾隆二十一年試補縣學生。晉學者為甯化雷公鉉，頌之丁父憂，自其父時與家奴有訟，及是到官，連六七年不解，破其家。乃棄家為胥，往來蘇州及浙江乍浦，織、蠶、質、運，力其贏以自食，積久之，家以復。君賈未嘗廢書，披一卷坐市中，冥心默誦，口指麾他事。學轉遷於未為賈時，朋試輒高等，獨不中於鄉試。既老，猶矻矻自詆，必得竟不中，以諸生終。其為人敦樸，力內行，而意氣豁如，務為有用。東南士人多不知耕，君獨買田汾湖之上，築室種樹，課子弟為耕。農隙課之讀書，其不耕者，分遣行視，賈業所在，罷還復讀。往來相送，代常曰：士生今世，不能自喫飯，則必不能安其樂。

當少年時。以為吾文士也。職於文而已。一旦失所據。則以衣食亂其心志。而敗行於倉猝者多矣。君雖孤貧。與兄弟同財。執其喪。過時而哀。無子。以兄之子。蓋為嗣。晚年作家塾。教其羣子。姓與戚屬之貧不能竟學者。所成就甚眾。居恒以畜治家。至於義所得為。趨之若鶩。欲外氏有女。无養迎之家。優奉之。族子某學於家塾。幾成矣。而驟夫遂養其母終身。一日遊杭之昭慶寺。見寺僧守癡。貌若有憂者。問之曰。吾擇一地以葬父母。而價翔力絀。是以憂。君瞿然曰。子號為出家人。而能志於是。不亦難哉。遽出金。趣地主書券。以其秀畀守癡。歲荒出粟以糶於鄉。斗減百錢。其生平忠實可倚。事類此。配史氏。明處士鑑之後。佐君艱難中。以克有成。而不獲其享。先君十五年歿。其年四十有三子。一蓋也。孫男二。青。縣學生。荆。孫女二。曾孫一。效。曾。其孤蓋卜以君卒之明年三月乙酉。葬君嘉善善縣魏塘南區。了凡先生墓側。青以書來。速銘。子與君交垂十年。以氣誼相得。知君為詳。乃考其世系。次其行事之可見者。著於篇而為之銘。銘曰。

士貧求官士而賈。賈而行義道何古。嗟君見義勇於虎。惟義之服。以有似續。而子而孫。以莫不毅。惟而鄉人而德之薰。讀我銘詩。來拜於墳。

張烈婦墓誌銘

烈婦姓徐氏山東嶧縣人監生淳女年十九歸同縣監生張承之季子士景三年而士景死烈婦從死在令

上建元之幾年又幾年士景從兄炳南試官江南來述其事將以某年月日舉烈婦與士景合葬某鄉某原謁余為銘烈婦為人端謹寡言笑以婉順宜其家而富於舅姑與士景相愛又能使士景行加修而學加勸監生君夫婦以婦故愛士景勝於未得婦時侍士景疾三十餘晝夜不一步離士景疾甚目無親頻呼婦安在他人雜指婦應曰在婦飲泣謂曰君所在吾馬不在君往吾斯往矣已而士景死家人知婦必死遽守之婦雖摧毀斷飲食猶故洋洋作不死狀欲以懈守者伺其間不可得既三日矣乃肅容詣舅姑前長跪若有所啟舅姑知其意慰喻之防守益密又明日天將曉烈婦欠伸謂守者曰若等環以守吾不勝勸即吾亦勸極矣令第欲少息指旁一婢曰姑令若伴我寢何如眾果不疑遂與婢偕入室扃其戶指榻承塵語婢曰此上有團扇亡人物也吾欲取若不能及汝暫蒲伏以背承吾取之婢童昏莫省所謂如其言伏遽登良久戶外守者呼婦婦不應呼婢婢不應乃羣譁排戶入赫然見婦自縊承塵間婢為所壓氣閉不得語解視婦不聞刀一金翦一蓋先時所藏欲以伺守者之間者也烈婦之死後士景四日於是遠近婦女聞烈婦之風皆來弔哭闐門

寒巷逾數十日未已。嗚呼。死者士所難。而烈婦之視死也如歸。此豈徒足以勵婦行哉。銘曰。

生俱生。死俱死。三版封。五嶽峙。來者拜之。行者止。世有負心。勿過此。此為張烈婦歸安之宅。鬼風飄飄吹汝魄。

春秋釋經自序

高澍然

春秋史也。與論異體。論有褒貶。史主實錄。二者不能彊同。而未嘗不相足焉。蓋褒貶依事以立。而事得其實。則是非明。功罪定。善者知所勸。惡者知所懲。於以撥亂世。反之正。未有切於此也。孔子曰。其義則某竊取之矣。豈非舊史文與事違。無以明是非。定功罪。因而正之。使其事其文各止其所。而義存焉。邪。則安得更立名目為褒貶也。自三傳興。而後有褒貶之說。究其大指。不離爵與名與人而已。夫爵人名三者。必有其實也。謂春秋忽沒之。忽易之。則後之讀其書者。又烏知當日孰君孰卿大夫。而為春秋所削哉。則曰。即所傳可考而知之。然則無三傳。而春秋不可讀矣。有以知其不然也。三傳不必盡鑿空之詞。亦據眾史而成也。然春秋方病舊史之不實而正之。而三傳乃取他史之未正者傳之。其烏能有合乎。不能皆合。而通之以褒貶。褒貶不可見。而當之以爵名與人。宜其愈解而愈惑也。余故專取證於經。以求其文與事各止其所。而義存焉者。久之而廓然有得也。曰。春秋之文實錄也。其事不待傳而詳。其義亦不假褒貶而見也。爰著所得於篇。其三傳及諸儒說有當者。不敢苟異。期於釋經而已。因名曰春秋釋經云。

梁陸林中丞退庵文存序

韓子論文曰慎其寶夫其謂寶者豈專於文求之哉不於文求之而充其實豈不足於文哉。寧置兩人集於此一無實而求工於文一有實而不以文自名。如以文論宜求工者勝不以自名者絀矣。然彼無實之文於古文冥追而默契之肖其體格焉肖其聲情焉可謂盡其心於文字之間者。要之體格之肖土偶之面目而已聲情之肖優孟之衣冠而已羊質而虎皮但見其可狎不見其可畏君形者亡焉耳而有實者亦既昭晰無疑優游有餘矣。即不以文自名其為文者故在也。因綜論之自韓子復古後同時之柳李宋之歐陽曾王三蘇元之虞明之歸王固斯文大宗矣。其外有實而可貴者區其體有三焉。清明和吉德人之文也。總攬橫竅學人之文也。生而言者可起而行通人之文也。三者不必求似古人韓子以為能自樹立不因循者是也。不必似古人歐陽子以為取其自然者是也。其精氣充溢方烜照不泯豈不可自成一家哉。長樂梁方伯莖林先生起家詞臣至今職勳勞內外為國屏翰其著紫藤吟館詩鈔久風行海內既成政歸哀其文若干卷為退庵文存屬澍然論之曰某生平精力半耗於仕宦亦半耗於詩其文但率胸臆言之未能求工也澍然謹對曰文何必求乃工哉求工之工是謂有人之見存未見其能工也已受而卒業見有清明和吉者有總攬橫竅者有坐而言已起而行者歎曰茲豈非實遂而光燿者邪三者得

一。已足自名。況兼有之乎。先生之不求工。乃先生之深於文也。謹述所見。請質以報。敢云序先生集哉。

康海論

許位

李夢陽代韓文草奏。劾太監劉瑾下獄。瀕於死。就獄中手書示康海。海言於瑾。夢陽免。踰年瑾敗。海坐黨逐職。世或以此少海云。嗚呼。士君子行己與人之際。難乎免矣。當夢陽在獄時。瑾必死。夢陽使其罪誠當。海不能以私交挽國法也。若縲絏而非其罪。則雖與其人絕不相識。猶且奔救。恐後况親厚如夢陽者。海既不獲越職抗疏。爭之於朝廷之上。又復惜此一往。吝此一言。以坐視直臣良友之死於非辜。而莫為之所。天下後世。將以海為何如人哉。瑾之言曰。今日甚好風吹狀元到來。若甚幸。其今日之來者。明乎其日日未嘗來也。夫惟日日不來而今日來。今日之來始重。今日之來重。是今日之來之康海。仍不失為日日不來之康海也。且日日來瑾之門者。彼何人耶。或曰。瑾奄人也。海巍科盛望。即不當詣瑾門。曰。是則夢陽之過也。海不往而夢陽死。則夢陽且為瑾辱。海往而夢陽不死。則夢陽未辱而海已為瑾所辱。均之辱也。是故為海則不能坐置友朋之難。而為夢陽者。不當書對山救我以要之也。不然。由前而論。海何以不一詣瑾。而遲至今日。屈身以全身。好名而敗名。然則海其從并救人者耶。乃海與瑾為同鄉。瑾方願海附己。其平日必口海不置。即微救夢陽事。瑾既海亦不免。海既坐瑾黨而罷官。則亦非夢陽所能轉救矣。事勢如此。殆又海與夢陽

所不料。而何以病為。雖然。瑾奄人。知重海。緩夢陽。後日魏忠賢作難時。楊左諸君子。殫死獄中。血肉狼籍。求為海之葫蘆。而不可得。且有反海所為。以助其敵者。世道人心之變。一至於此。詩曰。人之云亡。邦國殄瘁。如海者。又可少哉。

與陳雲伯論海運書

三年前承示海運議及書後一卷。嘗攜行。及自隨。頃在真州竹里館。夜坐聽雨。人事屏絕。始得取而卒業。洵異乎俗吏之所為矣。所敘運道考證詳備。其擬議亦皆與不佞意見略同。及今河清海晏。此事遂廢。然而酒可不飲。而不可不醉。兵可不用。而不可不備。緘口於廟。恐違蓋各之義。執裾於途。又蒙未同之羞。無已。則仍與足下言之。抑波及又君之餘也。蓋凡事皆具兩說。今有以海運為可行者。必有以海運為不可行者。之二說者。一彼一此。是猶兩小兒。以大小涼熱爭日之遠近。雖聖人不能決矣。然皆窮極其事理時勢之利害升降。而未嘗深求其情與弊也。則試進而妄言之。邱濬曰。海運雖有漂溺之患。而省牽率之勞。潘李則曰。文莊計漂溺之米。而不計漂溺之人。此仁人鵠如之言。似矣。而不盡然。嘗攷元時歲運漂溺米數。統計不過什之二。三。而此什之二三。吾知其非盡漂溺也。饕餮之嗜。鷹犬之獵。雀鼠之壯。狙之伺。城之封。魚龍之變幻。皆足以損此米數者。特於運至之日。胥謂之漂溺云爾。夫米既漂溺。

必將歸責於其人則并其人而胥謂之漂溺於是乎有頌除之語有歸賞之典故或倉庫未實府庫先虛此別所謂弊也今運真黔銅鉛者往往師其故智然而潘李馴何以不主海運也曰李馴河臣也禹治河專治水後治水兼濟運使運可海而不必河河亦幾於毋治矣而李馴河臣也河不必濟運而河臣之權微夫權微則才斂才斂則功薄功薄而名不重勢不尊此又所謂情也故恫喝震驚之以賊盜風濤而不足者又復假仁義以文其意其意何居曰從此不言海運而已乃今之為是說者非河臣也曰是孟旦之鳥也鳥之鳴聲曰得過且過其諸畏難苟安者幾夫知其不可而為之者聖賢也知其可而不為之者其人當居何等濬又曰善謀國者恆於未事之先為意外之慮高議亦有云今河務亦孔亟矣始則因河以誤濬而多守候牽輓之費繼則因濬以誤河而停疏濬修築之功有旨哉斯較濬李馴之時其當議海運也尤急且即足下之為此議也距今又閱五稔山梁雌雉時哉時哉見兔而顧犬亡羊而補牢夫豈古人漫為譬喻以誣來者今吾與子雖出處不同要皆歸於能言而不能行其能行者又不能言俱已夫杞人之憂天也洵愚然苟倚杵而壓己焉彼固無由遯逃也則亦不得謂之愚也野人之負暄也誠愆然累挾纊而戰勝焉彼又未嘗受賞也則亦不得謂之陋也

與陳孟楷秀才書

承贈詩送行。並勞走別。心根於性情見乎詞。感甚感甚。今之後生。不患才少而患其學術之疏。然大雅未衰。必有英絕領袖之者。足下當不妄自菲薄也。前詢北直水利。適僕爾時真逆神。不能終竟其說。乃僕係北人。昔嘗留意於此。三十年來。從無與僕議及之者。今足下一旦下問。心輒怦然。蓋燕雲十六州。僕少年車馬三四往還。知其無處不可興水利。特當事者畏難苟安。不為慮始。而北方之民。愚情相半。有田不耕。有村不織。坐俟三冬之雪。仲春之雨。五穀勃然。相慶收穫。設使天屯其膏。非澇即旱。男女嗟歎。併命飢寒。弱者溝壑。壯者四方。其弊若彼。而其患若此。則惟水利之弗講也。夫古之王者。多在西北。黍稷桑麻。未嘗不備。則信乎其得水利也。今雖井田既廢。屯田可行。屯田興而水利出焉。僕又知燕雲十六州之地。無處不可屯田者也。夫事之遠且大者。非一朝一夕之功。非一手一足之烈。今誠能儲其說。以待之後。必有因其利而用之者。足下年富力強。好學不倦。何不乘此三餘。取諸史之行屯田者。一一摘出。參之以經傳中溝澮之法。證之以郡國利病書所論。躬年累月。著為一編。勝於議保甲志武備矣。又鄭氏水經注於西北獨詳。近東潛趙氏所刊水經注。極稱精博。其各史郡國地理等志。亦宜互證。至三國十六國。洪稚存太史有盡域志補一書。頗

為賅洽。可以依據者也。明史河渠志亦應攷索。以時代相去未久。遠河道亦大同小異。而北方之水以河為主。由屯田而及治河。而及海運。蓋足食足兵而民信之。故曰井田之法。寓兵於農。屯田之法。寓農於兵。此儒者之立言。非處士之橫議也。泊舟丹陽北郭。夜雨浪浪。不能成寐。燒燭書此。以理前說。於抵真州日封寄足下。冀補聰明之萬一。

求心錄序

會稽何汝夫先生。乾隆中嘗為江右劇縣。廉公有聲。既擢郡丞。緣事引疾歸。已而捐館。今二十餘年矣。余生稍晚。不獲事先生。而與先生之孫茂才恩熙為雲霞交。因得盡讀先生之書。求心錄其一也。卒業三黜。乃操觚而序之。夫章句之儒。不知治法。刀筆之吏。不知治體。而天下郡州縣之官。動以千百計。庶績孔殷。兼才罕。故用儒則多迂疏。用吏則多刻薄。枘鑿不入。繭絲是為。國弊而民困。殷患均也。先生稚即穎異。里有神童之目。及長讀書。屢躋於場屋。乃棄習名法。出而為諸侯賓客。久始筮仕。為從事。夫以先生之才之學之識。讀其書而知之。登之廊廟。則非治中別駕也。委之封疆。則非長史參軍也。崇禎考文。所以潤鴻業。盤根錯節。所以別利器。而顧一屈於幕僚。再屈於衙官。洎為縣令。郡丞。雖治行稱最。而卒未竟其用。而囊者刀筆之吏。章句

之儒類皆能爲升斗之祿握尺寸之柄躋顯要而報循良然則先生之初願豈遂僅以著書終老哉康誥曰如保赤子大學以爲心誠求之雖不中不遠孟子亦言學問之道求其放心而已則士讀書致用所學如是出而從政豈乘初跡故北山黃公善譽先寢膳而後鍼藥汾陰侯生善筮先人事而後卦詭以爲反求諸己言近指遠不負此心即不負此事也其有摘伏發奸而新神明之稱照仁子義而解慈惠之師者則其震名略實飾外教中而未嘗致其求之道也然而儒林循吏之傳去人遠矣先生之居幕府也視官事爲己事就三去三磊磊落落及其服官自郡功曹以至同守所在興利除弊彬彬文質直不近蹻廉不沽名倘所謂兼知治法治體者歟抑余聞先生游幕入官前後多感德之事往往大獄俄起卒賴解免錄中顧弗及焉夫遠伯玉恥獨爲君子而陰德則譬如耳鳴也然鼓鐘於宮聲聞於外知其後世將有達者茂才勉乎哉因歷序所論於簡端越茂才急刊行之上可以儲作史之材下可以資理縣之譜官守其箴民受其福其利甚溥其效甚遠蓋非徒與茂才述祖德而脫交情也

書孫督師撫秦四錄序後

此明上虞倪公元路爲代州孫公傳庭作也當崇禎時孫公受命撫秦寇勢方熾蓋

屋之戰。遂擒其魁。檻車獻俘。別賊震懼。退而清心。以期再舉。而時相楊嗣昌。伎之生辭。職引疾。逮繫蒞室。茂其既奏之功。罔以無將之罪。刑賞不中。莫此為甚。蓋讀史至此。不能不廢書而歎也。迨後秦蜀之賊益張。乃始出公圖廓。賜劍督師。而天德既廢。人謀莫支。河南兩口之決。關中七日之雨。賊乘其敝。兵敗身殉。向之徵發期會。斬將塞旗。九仞一貫。國亦隨之。悲之。倪公時在司農。屢多贊畫。而君臣之際。時掣其肘。故其序公之錄。謂以簡轅隨顛之餘。為滅寇更然之舉。能留其身於危疑刀鋸之時。而不能伸其業於仗鉞聲靈之日。沉痛迫切。殆難顯言。而孫公以科目起家。文章爾雅。史又稱其長身伉爽。才武絕倫。方之於古。殆馬伏波之流。遶運陽九。再用而躓。乃或管其泥古車戰之法。因而一敗塗地。是使生前之諉。既烈於交趾。死後之議。復貶於陳濟。忠臣義士。短氣傷心。夫當禽渠之後。威信既行。繼以清心。實將裕餉。此足食足兵之良法也。浸使貝錦不成。節鉞久擡。撥亂反正。可望於時日。蓋不患賊之不平。而患兵之不練。不悲其後之効死。而甚惜其前之被逮也。今其四錄散亡。不可得見。心迹學術。皆莫能詳。此倪公一序。為不可少者矣。序中復言武陵以盧督宣。大洪督刺。遂致盧洪軍敗身殲。謂象昇承疇也。象昇戰殲鉅鹿。而承疇實未嘗死。乃當日於盧則誣疑其偽。於洪則謬信其真。故孫公之錄。始於丙子。倪公之序。成於甲申。是尚不知

承疇已降入我朝而與盧公並為歎惜。他日承疇若見此序將何以自立於天地間哉。

自春秋至戰國國皆一卿為政秦置丞相而貳之以御史大夫漢因而不改光武懲數世失權強臣竊命遂不任下歸其政于尚書而三公無權亦不假后黨以柄數世之後三公備員如故而外戚宦豎擅權至于國事不理則譴責三公或死或免此可悲也仲長統之論如此其意以為任之重而責之輕與任之輕而責之重皆非制治之體然苟任之輕而責之輕亦非所以用大臣之道也古今治天下者大權固必歸於上然一日萬幾欲以一人總細大之事則其間精神意量必有所不周故周公戒成王所拳拳者惟在三宅三俊而謂文王固攸兼于庶言庶獄庶慎蓋重任三公責其成事雖有戚宦窺伺其旁亦不能奪之若不任三公則凡精神意量不能周之際思得人以代之亦情所不免也當是時非左右近習是任而誰任哉左右近習巧為逢迎事事求合於人主之心則必信用之矣信用既久則權歸於左右近習猶秦然自謂權不旁落而天下之大勢已去漢事然也前漢元成以後名為任大臣而大臣之位已為戚宦所據是亦未嘗任人也後漢不任大臣則戚宦之亂政益可知其必至矣方其盛也英主在位智足以變通其道而賢臣亦能宣力則天下皆安及其衰也弱主在位力不能奪戚宦之權而公卿亦坐觀其成敗則天下日危然則專任一卿

固失之太重。不任三公。又失之太輕。審乎國勢之輕重。而擇賢者以信任之。斯治天下之道得矣。

復社姓名錄序

初顧端文公與高忠憲公講學東林書院。聞風向慕者先後至而忘之者。攻擊不已。諸君子或死或黜。書院中廢。而復社興焉。吳扶九先生合之。張天如楊維斗兩先生主之。大旨以文明道。與東林相應和。而立格稍寬。入社者至二千餘人。方社會時。舟帆雲集。四方瞻學有聞望者。半在列。固一時之盛也。端文之言曰。官京畿。志不在君父。官封疆。志不在民生。居水邊林下。志不在世道。君子無取焉。復社亦師此意。而頗力於文字。或疑其非聖賢之學。及莊烈愍帝殉社稷。乙酉丙戌丁亥三年間。為故君死者。大率復社幾社中人。也不死而終身隱遁者。亦多出於社中。當是時。天下之士。推究始終。乃知復社為聖賢之學。無愧於東林也。其間亦有名在社中。而後乃失身改節者。特百人之一。未可以概其餘也。考有明十六朝。武宗始失政。至神宗而上下苟安。庶事隳壞極矣。熹宗信用魏闡。流毒四海。懷宗雖有志振起。然不能知人。委國事於周延儒溫體仁。而天下遂不可為矣。賢人君子。不得安於朝。則退居於野。與二三同志。脩道畜德。見之文章。而聲氣千里相應。此亦忠憤之所寄也。古昔盛時。庠序樂

畜言揚行舉其進而貴者皆當貴者也退而賤者皆當賤者也於是士有拔茅連茹之慶民亦得蒙膏澤焉如復社之士其高者固天所降生以資世主之輔弼其次亦多令才可以任用而國祚將終小人道長徒使沈默寂寥聚散於華澤之間可慨也已凡在社中者姓名具書之而南都防亂公揭附於簡末用志一時之公義云

錢繼升傳

繼升錢氏昌其名也居吳江之保障里今屬震澤崇禎八年以選貢授郡通判不就歸是時天下多盜而含山盜最禁惡繼升家饒於財一日有二人踵門云奉主命貸銀數千兩必得以返詢之乃含山所遣也繼升勞以酒食為好言慰之曰銀不能卒備幸緩數月當齎至山中其人約期而去繼升念曰盜不可藉之銀且豺狼無饜時不如以家之所有募士守禦庶幾全吾鄉里因具狀請於官得便宜從事乃立格募兵歲方飢聞者先後至家有大小木仆地繼升言於眾曰能舉此木者留未幾有崇明武學生黃扶搖等四人至皆黃姓號曰四黃遂令訓練曹伍里人吳彥康等亦別募壯丁自衛皆聽繼升指揮含山盜惡繼升負約率其黨至鉦鼓喧闐若甚可畏者里中武士皆持兵教弓指之盜惶駭說云吾曹欲往木漬取糧不過假道貴邑何紛紛為繼升使謂之曰爾既無意侵掠何不藏爾兵器盜不得已舉兵器斂之繼升縱兵奮

擊盜賊焉。久之盜有沈判者。乘大舟擁黃蓋。駐野泓澆。聲言欲為含山報讐。繼升兵少力不敵。時職方主事吳公易。以兩都失守。倡義起兵。有衆數千人。因抵職方。借其兵。職方初難之。卒與舟師二百。而黃扶搖等率之以歸。繼升偵判船設礮。患之。遣人偽為乞人。至其船丐食。潛以鹽由滴礮中。及判發礮皆不起。繼升用礮壞其船。遂獲判。先是扶搖獻計。謂盜來必乘舟。舟必蔽以葦席。若用絲附條。而灼膏射之。則糜爛矣。從之。於是盜船盡焚。烟焰四起。卒膏樂者。判黨之勇者也。繼升與搏戰幾殆。有許某者。斬膏樂。蹂其頭溪橋。繼升乃徐訊所獲之盜。段其葦為盜者。數其脅從者。頃之盜復夜入。屢中不遂。自是不復至。閩潘聞繼升名。使以禮聘。繼升謝不往。而吳職方敗走。大軍購之甚急。跡及繼升。繼升與吳彥康皆被逮。提督吳某再三詰問。繼升有辭得免。并彥康亦免。繼升與弟威皆能文。威中順治丁酉鄉試。以同榜有事。竊甯古塔。繼升亦牽連至京師。病卒。余少時數聞父老言繼升事。後從其家得所記錄。為書其始末如此。蓋繼升與職方吳公。才略相似。嘗薦四黃於職方。參其軍事。既而職方以身殉國。繼升辭閩潘聘。為聖清之良士。各行其是而已。繼升嘗自謂心術不甚壞。惟屠戮太多。難免于陰禍。安之。姦宄出沒潢池。弄兵之時。民亦良苦矣。如繼升者。其所全豈少哉。

實心藏銘并序

汪廷珍

嘉慶十有九年。尚書總督浙閩桐城汪公。自作生壙。名之曰實心藏。而其同里刑部姚姬傳先生。為之銘。既而尚書以廷珍性拙而好直。於實之義有相近者。且同出唐越公後也。俾復銘之。竊惟刑部之銘。其敘公之世系。游歷當官事蹟。與所以銘藏之說。備矣。於法不當復銘。顧廷珍以同姓後生。官職所至。時獲與公共事。得以親見其行政。聞其言論。竊有以知公。蓋嘗從事於聖賢誠身之學。而有得者也。公不敢居於誠。而自矢以實。實之與誠。豈有二哉。聖賢之言。誠莫備於中庸。達道達德。九經行之則一。一者誠也。朱子曰。反身而誠。則仁矣。誠者。誠吾仁也。仁者。人得乎天之理。而發之。則為情。情而不當乎理。則私欲而非情。理而不洽乎情。則矯激而非理。合理與情。仁之謂也。知此之謂知。強此之謂勇。其權度在中。其功夫在誠。其學則自為己。慎獨而極於位天地。育萬物。其道則本乎修身事親知人。而歸於知天。一言蔽之曰。實心而已矣。予觀尚書之為人。才敏而習於治。庶務雖繁。沛然有餘。而其處事也。兢兢業業。慎以求中。惟恐幾微之過。與不及。而不得乎情理之實。及其準之情理。確有所見。則毅然為之。成敗利鈍。一聽諸命。而不顧。嘗作可靠說。自述其生平得力甚詳。今行年七十。教人自為守之。如一日。過此以往。蓋可知矣。廷珍樛昧。竊嘗有志於世。而病其

才之拙。問質諸公。公曰。人有何才。實心即真才耳。予始聞而過之。退而思之。實者志也。才者氣也。志至氣必至焉。公之初試為令也。上官迂之。屢欲擯以司鐸。既為守令。治民聽訟。有神君之稱。虛膺繁劇。所至輒辦。其為大府也。廉公靜正。吏民無智愚賢不肖。咸信之。豈獨才過人哉。大學曰。心誠求之。雖不中。不遠矣。孟子曰。至誠而不動者。未之有也。觀於公而益信。銘曰。

天下雷行。物以終始。大人之心。不失赤子。道風既邈。士也二三。旗常之赫。衮影之懸。我我尚書。惟邦之翰。明憲廉能。勳名有爛。何以為治。曰理與情。惟茲實心。矢以畢生。我銘厥藏。用詔來世。辭無虛美。懼拂公志。

萍邑興賢莊記

劉鳳喆

江右古風。積祠設旆。試士以勵其家之讀書人。俾服習名教。恆沐衣冠禮義之澤。尚已。然不能戶立祠。祠殖產也。吾萍自嘉慶辛酉。廟祀文昌於邑中。慕義者即其旁舍。為興賢堂。十鄉之人。子若孫及身及女士。爭出田穀金錢。納於眾。於是。有興賢莊之設。歲取租息。供童子三試卷冊費。諸生鄉試。諸貢朝考費。已舉士上春官計偕費。皆先事為之備。掄元掇鼎之祥。則厚為賀而賚之。而又專歲入租期之踵接。以示優異。益以勵其鄉之讀書人。敦尚名節。小而表儀膠序。大而登進為公卿大夫。率由茲選。近科萍人領省解者。連獲其三。繼此巍然大魁。必更有好修奮起之彥。大昌吾邑之文明。可操券俟者。堂後各祀其先。迺毋忘本始之義。亦足以矜式後賢。洵可風也。夫士之取科第。如探蓍。焉知誰得。則此千百之衆。於銖粟。違計其為誰而為之。無所為而為。為公心。又安有不當得而得。為僥倖者。此其間殆有神相之歟。逸史稱隋末一書生所居。抵官庫有數萬錢。欲取之。神人訶止曰。此尉避公錢也。可知子奪之權。默默中非人所喻。充足心以萍志功名。必能窮不為貧。移違不為利。祿力扶世道人心之正。仰副朝廷造士之隆。奚止為吾邑幸哉。若夫條畫之善。一以鄉之子姓。究其贏縮。請諸有司。而吏胥莫能持。公諸舊家。而異籍無敢濶。普惠寒。暖。推廣。

皇仁庶乎於學校人才不無輔翼之助故樂聞其事而書之是莊計數若干石錢若干雖載在圖冊碑櫨並書以垂久遠

个園記

廣陵甲第園林之盛久冠東南士大夫席其先澤家治一區四時花木容與文譙周旋莫不取適於其中仁宅禮門之遊何坦乎其無不自得也个園者本壽芝園舊址主人闢而新之堂皇翼翼曲廊邃宇周以虛檻故以層樓疊石為小山通泉為平池竦蘿裊烟而依迴嘉樹翳晴而蒼甸闡爽深靚各極其致以其目營心構之所得不出戶而壺天自春塵馬皆息於是娛情該養授經過庭暇肅賓客幽賞與共雍雍蒨蒨善氣積而和風迎焉主人性愛竹蓋以竹本固君子見其本則思樹德之先沃其根竹心虛君子觀其心則思應用之務宏其量至夫體直而節貞則立身砥行之攸繫者實大且遠豈獨久青夏彩玉潤碧鮮者斯州篠蕩之美云爾哉主人爰稱曰个園園之中珍卉叢生隨候異色物象意趣遠勝於子山所云敬側八九丈從斜數十步榆柳兩三行梨桃百餘樹者主人好其所好樂其所樂出其才華以與時濟順其燕息以獲身潤厚其基福以逮室家孫子之悠久咸宜吾將為君詠樂彼之園矣

萬節婦傳

清河節母蕭氏事孀母孝。母老疾。刲股進藥。勿使知。十七歸。萬一載姑亡。又一載夫亡。志與偕。顧翁衰羸。大家無彊昆弟。一子甫五月。事甚重。忍死以節誓。翁故治醫。嘗不給。歲丙午。大穰。晨夕。漉粉糜饋翁。自率未嘗飽。夏疫。力疾侍翁。翁起引避。輒恹然曰。老人至此。無子也。婦即子。忍暫離左右。翁歿。無以斂。躬提汲。寒其寢。手柳枝。揮逐蠅蚋。訖。兩晝夜。挈其孤。謀備禮。瀕死者再。既葬。家益困。孤稍長。責之讀書。且曉之曰。若學不成。妾固失望。如若祖父地下。何孤試秀才高等。脫然以敦行業。振門祚。為畧。同室從子女四。無怙恃。衣食嫁娶。咸任之。有適沈者。患癰。廢迎歸。悉力療治。它苦心慈行類如此。蓋自女而歸。而子之母。三數十年中。無一日非疚心泣血之日也。嘉慶庚午。有司表乞。旌如制。癸酉。以明經拔萃科。薦其子於朝。于時母心慰而母德滋。以彰勲。曩子職史官。見天下之以節孝聞者。歲終必彙登簡末。或病其冗。于執之曰。閭閻幽微。幸錄姓氏。奚可略。得仍備書如例。今明經君。哀事狀。諗予。予惟節守名義。孝原天經。如母之刲肉救母。扇暑哭翁。二事。實恆情。莫及。今母未周甲。子方文行著聲。將有樹立于時。惟訓勲。其福行未艾。君子謂萬母為節禮。專精之至者。詩曰。辰彼碩女。令德來教。又曰。釐爾女士。從以孫子。此之謂也。謹援列女傳。義次而傳之。頌曰。

淮之水清且泚。好女子。勝男子。股血凝。活母死。老翁疾。僵不起。呵冰屍。逐疫鬼。呱呱者。士為士。昌萬門。必大矣。賁麻紙。煒彤史。彼蒼蒼。宜壽祉。

鄧孝子傳

鄧君觀瀨。邑故家子。幼有至性。隨父悔庵公宦京師。師授詩。至黎莪。輒泣。人異之。稍長。隨父監司中州。職防河。聞而識其條畫。父遷蜀。提刑以巡鹽舊案。逮遷。藉沒論死。賴朝恩於緩繫。圖三載。瀨隻身左右而已。會族兄某至。瀨夙有白贖志。父慮其無濟也。潛督楊勤慈公。諭乃公為吏部清介官。當不以貪賂為瀨謀者。屢乃徧走齊鄭燕趙間。當夜墮叢莽。孤危嗥嘯相通。一僕劉章。沮勿行。弗顧。遇獵火出馬。間闕抵京。訴於步軍統領阿果毅公。叱曰。爾擅入禁地。不畏死耶。命繫暗室。君度父無生理。誓自殞。守者一武弁。聞哭聲。詢故。義釋之。它日復伺間。訴於相國傅忠勇公。及阿公馬前。傳語阿曰。穉子富謹。救難能也。宜上請。阿亦恻然。二公取其辭。入奏。得旨。鄧某情可原。准贖。傳遣飛騎為孝子賀。蓋深重之也。納錢入。父獲免。先是母卒於家。迨見父始知。奉父生還。畢母葬。越二載。父旅殞南陽。復旬。歸其喪。昇如禮。其慘瘁倍嘗如此。他行誼具家狀。子惟人生骨肉之際。愛危覺迫之時。以為死也。而坐待其不能生。與以為生也。而終遂其所欲生。而身之死不死。不與焉。誰非人子。道苟不幸。能

如瀨一念之誠通天人之感者其有幾耶嗚呼可謂孝矣。

自度記

張經田

曠辨溪與余論佛法。問念慮不住。云何降伏。云何滅度。余曰。佛非能度人。須人自度。嘗讀六祖法寶壇經云。邪迷心。誑妄心。不善心。嫉妒心。惡毒心。如是等心。各項自性自度。何名自性自度。即自心中邪見煩惱愚癡。眾生將正見度。既有正見。便般若智打破愚癡迷妄。眾生各各自度。邪來正度。迷來悟度。愚來智度。惡來善度。如是度者。是名真度。舜溪曰。既自度。何用歸依佛。余曰。君又不聞壇經自歸依之說乎。六祖云。歸依佛。佛在何處。若不見佛。憑何所歸。經文分明言自歸依佛。不言歸依他佛。自佛不歸。無所依處。自歸依者。除卻自性不善。嫉妒。諂曲。吾我。誑妄。輕人。慢他。邪見。貢高。等心。及一切時中不善之行。常見自己過。不說他人好惡。是自歸依。常須下心。普行恭敬。即是自性通達。更無滯礙。是自歸依。彼世之所謂佛者。莊嚴色相。四大威儀耳。以為佛在是。又所謂歸依者。緇衣。祝髮。鐘磬。膜拜。以為歸依。即在是。以是佛。以是歸依。是即如來所謂若以色見我。以音聲求我。是人行邪道。不能見如來耳。夫壇經之所謂自歸依者。即自度也。金經云。我應滅度一切眾生。滅度一切眾生。已而無有一眾生實滅度者。如謂佛果可以度人。佛何不發廣大慈悲。奮金臂力。放白毫光。化濁塵為淨界。變諸魔為善信。更不須神通威力。以法遮制也。是故佛當度眾生。實衆

生自度論語云。退省其私亦足以發。於回也。如愚見之。夫子之邁忠恕而已。於曾子曰。唯證之。君子造道。其自得也。他日舜漢向余曰。自聞自度之說。時時反求諸己。覺若干種心。消去許多。而後知從前念慮不住。皆自由無主宰。遂呈偈曰。提耳發其聰。幸汝維摩手。自度兩字經。諦揭終身守。

國朝文匯乙集目錄

卷五十三

曾鏞字麟堂浙江泰順人乾隆
己酉拔貢官湖北知縣

答汪方伯書

一

國朝二十四家文鈔序

三

尤維熊字祖望號二鏡江蘇長洲人乾隆
己酉科拔貢官雲南蒙自縣知縣

遊燕子洞記

四

如皋冒氏水繪園記

四

來青軒記

五

贈中憲大夫應山彭公墓碑銘

五

石韞玉字執如號環堂江蘇吳縣人乾隆庚戌
一石進士官山東按察使有獨學虛福

監法論

七

林和靖詩序

七

明王忠文公集序

八

重修義烏縣忠孝義祠記

九

四川敘永同知周君墓志銘

十

洪亮吉

字君直一字稚存號北江乾隆庚戌一甲二名進士官編修有卷苑閣更生齋集

剛柔篇

十一

守令篇

十一

珥塘荆氏族譜序

十二

錢大令維喬詩序

十二

重修明太常少卿凌公祠墓碑記

十三

祝貞女傳

十四

湖北呂堰驛巡檢王君神道表

十五

李慶芸

字生甫號許齋江蘇嘉定人乾隆庚戌進士官福建布政使著有松香吟館集

徐秋涓繫事表序

十七

重修汀州府學碑記

十七

徐州府學教授王公墓誌銘

十八

凌廷堪

字次仲安徽歙縣人乾隆庚戌進士官甯國府教授

復禮上

二十

復禮中

二十一

復禮下

二十二

金匱要略汗論

二十三

國朝文匯

卷五十三

目錄

二

乙

集

國朝文匯乙集卷五十三

荅汪方伯書

曾鏞

呂叔簡曰：變民風易，變士風難；變士風易，變仕風難。仕風變而天下治，所以然者，民風者從乎俗，非必有干譽干祿之見，固結而不可變也。士風者從乎學，非遠有患得患失之心，戰悸而不能變也。仕風者富貴之權誘於外，利害之念迫於中，有欲變而不能自主者矣。有變此而無以自容者矣。董子曰：琴瑟不調，甚者必解而更張之，為政不行，甚者必變而更化之。今下而州縣仕也，任變民風，士風之責者也。上而督撫亦仕也，又操變仕風之權者也。督撫之賢者，誠不乏人，竊以為失於粉飾太平之意多也。州縣之不肖，誠非一端，竊以為壞於詘支彌補之故亦不少也。財賦者國之大政，天下之大命也。盛衰興廢，靡不由之。今州縣虧空之弊極矣，前此為上司者，既不能慎之於始，姑息調護，釀成巨弊。至於今日，新故相乘，各存一切徼倖苟免之心，其謹弱者，日夜勾稽，以免咎，而躬年有所不支，強幹者，苟且補苴，以干進，而外此舉所不知，又何暇加意於汎汎然之士風民風？為從容厚厲於農桑學校間哉？是故言兵刑，向曰辨案，今且有所謂做案者矣。言錢穀，向曰交盤，今且有交帳者矣。此仕風一大弊。州縣之不肖，亦上司粉飾之過也。大臣身膺民生國計之寄，即無慮久，久發露

罪且及身。一旦橫有方千里之災。一省突有數州郡之盜。倉皇待濟。問何以給。雖然。欲彌補必設法矣。洵思之。設何法。財賦者不雨於天。不湧於地。欲舉一二十年之積弊。驟取償於歲月。非股民何由得此。夫徵歛之際。貪墨之府也。其所以不敢肆為勒索者。僅僅恃 國家理財持宏綱大體以保障之耳。更迫以勢之無可奈何。與以事之得所藉口。明目張膽。何所不為。竊恐在虧空之日。則相習為盜臣。在彌補之時。則相習為聚斂。臣傷邦本以補國計。其患有不可勝言者也。愚謂病無良醫。與其病民無甯病國。與其不能割使寅揶卯擗。在府庫已缺一年之實。而催科訖無甯吝。無甯渙其大號。破格施恩。俾天下一空從前之累。而徵輸得循舊章。除見在州縣本任虧數。立限追補外。其確為前任之所虧者。一并棄去。不復窮究。於是肅清本源。更遵成法。按屆輸將。庶幾積弊一祛。可圖再造。料天下賦稅之所入。與州縣倉庫之所虧。多不過損國 家半歲費耳。未為大病也。而府庫無空名之承受。歲時無先期之催科。民免浮額之誅求。吏少借端之剝削。不補而財轉實。不滿而法已行。豈不直截何計出於童穉之所知。而事苦於 國家之所難也。古今國勢之強弱。治亂不患蓄積之不多。患度支之無實。不在災凶寇盜之有無。在吏治人心之動靜。昔孔子與子貢論政。至於必不得已。曰去食。去之乃所以足之也。藉不能為此。則且取州縣之大貪蠹者。

誅之完之奪且追之以懲一時。其在中材則且視歷任所虧量其多寡假之歲時或三四年或七八年或十年分年賠補一切急遽苟且之法概行罷去庶幾州縣之職得從容從事守牧以上亦得以風化相董率而不至以財賦偏注於一途國家之財猶可得而理師師之風亦不至遽壞而不然者急則敗矣上以此蹙之官官必以此剝之民幸而無故取怨端耳設不幸而小小加以災凶寇盜一夫偏袒千百景從此時即欲傾一邑虧補之數為一邑捍禦之需其可得相當也邪是故國可貧民必不可使窮夫豈獨民不可使窮卽州縣亦不可太窮也民窮則亂官窮則貪貧固亂之由也此當今一變仕風之至急務也至欲正其本源則無非崇節儉節儉之道壞其大者固莫如上司苞苴之公行歲時舟車之縲絡然上能絕之使不上行下不能抑之使不自縱則使能節之於公不能節之於私終無益也每見一行作吏服食起居便託儒素方其位任負通不貲而遠近尚視為金穴輾轉引薦攀履調笙充滿廊廡一人所餽少者數十多者數百甚或盈千一署之內用以致富者不一嗚呼奈何其不窮且貪也愚以為胥役衆害民使令衆害官此皆力宜裁抑者也若夫欲循夫職守則莫如少更調古今吏治之壞多起於不久於職漢宣帝以為吏數變易則下不安久於其職則民服教化其二千石有治理效輒賜金增秩或爵至關內侯迨公卿

缺則以次用之。故其時吏稱職。民安業。號稱中興。宋文帝恭儉勤政。百官皆久於其職。守宰以六期為斷。元嘉之際。四境晏安。戶口蕃息。亦三十年。左雄上疏言典城百里。轉動無常。各懷一切。莫慮久長。特選橫擯。損政傷民。咎皆在此。此真達吏治之言也。國家之爵祿崇卑大小。因所以鼓人才。年限太拘。未免沉滯。然亦宜稍稍持久。不宜太煩。庶幾上下相望。賢者得以究其所施。中材亦不敢心存苟且。故吏之不才者。雖終朝視之。不為驟。若見一吏才。輒調一缺。所調員缺。又加調焉。而更委員署之。且無論五月報政。暮月已可。世難其人。恐二三強幹之員。轉相促急。精神作用。不在下。民專在上司。更何怪盡心守職之難。概見也。愚以為地方多一衙門。適多一地方之累。官府多一更調。并多一倉庫之累。吏胥得乘間舞弊。故此尤當謹也。若夫羣下之所揣摩。大員之所顧忌。內自獻納之微。外訖軍國之大。有非法制可得而問者。而今日未敢悉言也。再者嘉湖收漕。多逾額。自顧歸諸方伯。提其餘。存以彌補。聞歸方伯去浙之日。嘗垂淚言之。以為未及罷。此通者閣下視州縣所虧。且如故。以為不去其弊。而但提其餘。是適以累民也。因舉歷來之所謂漕規者。嚴禁而痛革之。且即其邑之所取。以救其邑之所虧。民同此數。而官無虛糜。蓋期於得補即止。此誠不得已一時權宜之所為。竊以為今年之漕。餘即明年之徵額。恐漕餘之外。又有漕餘矣。悃悃

之誠願無使人謂漕餘之有加幾當今如公且亦未之察也敢并及之

國朝二十四家文鈔序

近世文有時文有古文時文代聖賢立言義至深而情實溢古文即儒者立言旨即淺而裁自心故欲窮古今之變考政教之遷觀學士大夫之所得求之於古文較近竊謂作者難取而集之者抑不易何以言之文章者天地之精華也散而洩諸古今才智人之口若二氣五行之分布於百草木其感其衰隨乎時會而其為用於人也其陰陽水火之性即其華實本末之際而用不同故取材必慎而後得其精華之所注蓋自六經四子諸書外一代之作一家之言有純有駁有離有合樂漢唐宋以來寥寥數大家均不能免也服餌雜人身之病也論著雜人心之病也於此而欲採輯羣言網羅一世出時賢之甘苦為後學之砥礪又豈易事乎哉是故文取載道吾以為必先有見道之實淵然寂然以日舉人世功名富貴成敗得失一不入於其胸中而後可與論天下之文嘉禾丁君子復携其里敬齋先生所輯國朝二十四家文鈔以示予先生於近代文均有選而本朝尤加意焉蓋以其近己而俗變相類亦當世得失之林也嘗自言其去取之意大率取其有益於人有用於世有補於修齊治平而其文復工絕可令人往復不厭者空談心性與夫臆陳故實者皆不與

馬一切庸俗講張之辭。盡行剷除。嗚呼。持是以論天下文盡之矣。每歎古今文章之病。立一說。毋不顧吾說有益之與無益。有用之與無用。且磨磨然。斯以文勝其實。則中無所見。究竟文亦何由勝。談心性。病虛妄矣。臆故實。病支離矣。且庸俗講張之病。或且至於蔽陷離窮。而不可究極。此無他。所以游之乎詩書之源者。無其學。所以行之乎仁義之途者。無其養。心未能怡然。渙然於天地民物變化云為之故。而欲怡然。渙然於口手之間。必不能也。觀先生斯鈔。其亦可以見其概矣。諸家文體之奇正醇肆。鈔中論之特詳。丁君復屬序於予。又何如。即先生之所自言。以弁先生之所手輯。使夫人仗而誦之。尤得其要領也耶。

遊燕子洞記

尤維熊

景嘗取道點中。與江君適文攬飛雲巖之勝。共詫為山谷奇觀。平生所未見也。余治蒙之明年。方有事於郡。以正月既望後二日。出縣行五十里。至雞街宿焉。其明日當至攀枝花。聞所謂燕子洞者。實隸阿迷州境。紆道三十里可達。江君欣然共期往遊。未至數里。山道阨塞了無所異。既而山腹中微見瓦脊。至則黃冠之廬三楹。其前三楹較高。缺拓後牖。俯瞰隆然山也。而嗚然虛其中。袤廣可列千人之座。其上則石溜鍾乳紛然下垂。如卿雲之狀。蕭索輪囷。不可指數。其斷處天光廓然。一久青樹從巖際蟠屈而升。如龍如螺。適富其空。若覆華蓋。谷聲磴磴。水聲潺湲。香不知其所從發也。道士導予經一小門。厯級而下。復循磴而上。度一石梁。凡再升再降。始得一川。川際崿岬摩谿。水穿其中。若吞復吐。霹靂黝深。真能探赜。燕輒飛鳴。千百為羣。若蜂之在房。蟻之附坭。亦莫知其適從何來。遽集於斯也。石壁嵌空中。出一手。宛然指臂。承以小樹。俗因有仙人折桂之名。余與江君相顧駭歎。以為飛雲巖之奇。又不足言。而天下瑰麗譎變之觀。至此而止矣。雖然。以天下之大。寓縣之廣。造物者之神奇變化。而區區一二人之足跡所到。耳目所及。又豈足殫哉。滇僻在西南之徼。唐宋以來。尚阻聲教。若斯洞者。固在蠻鄉夷獠之中。元明漸入版籍。至今數百年。商賈仕宦之迹。

稍稍涉足。而吾與若因得知斯洞之名。而又適天假以窮其勝。其地荒遠僻陋。不得而窮之。與并不得而知之者。又不知凡幾。昔人以遠東生豕頭白。異而欲獻。至江東見羣家皆白。而悔。安知他日所到。不更有奇於斯者。而斯洞復為遠東之豕乎。然則人之為學。將深造於聖賢之域。雖有所得而未可遽自足者。亦若是而已矣。是日與江君留宿。對榻成一詩而去。越日復為記之。如此。江君余內表兄名珪。

如皋冒氏水繪園記

自有明之季。以迄我朝。順治康熙間。貴則公卿大夫。賤至樵夫爨婦。無不知冒氏水繪園者。其盛也。辟疆先生倡吟壇。寒赤幘冠蓋輿馬。存問饋遺。有鄭莊置驛通賓之風。海內才俊雲合景從。如晨風鬱乎北林。游鱗泳於巨川。至則論列圖書。商榷文史。俯仰於高下之際。縱橫乎道藝之數。又或行觴搢矢。擊刺彈棊。莫不於是園焉。蓋當時閭閻之士。大書特書。不一書矣。不數十年而冒氏既衰。乃割園以鬻於人。有馬氏者。僑居其四區之一。其他溝畫水分。裂若方野。俄而舍馬者凡數姓。又不數十年。而數姓之居盡歸於馬。又不數十年。冒氏之子孫。思復舊宇。而馬竟以其所并數姓之居。及所居四區之一。合而仍歸於冒。計一百餘年之中。人事遠流。有若此者。天地遂虛。人生逆旅。亦可感已。今夫華屋山邱。銅駝荆棘。伊古以來。不知凡幾。其傳之稍

久者則名賢賞析之區。文士著述之地耳。然而元亭選樓書巢筆冢。今之能舉其名者。已僅僅十之一二。至若玉山之堂。月泉之社。去今曾幾何時。而大半委之榛莽。然則水繪園之復為冒氏有也。豈偶然之故哉。吾不知今之冒氏之後。偃仰於園之中者。尚有登壇建幟。如辟疆其人。能奔走天下士。而天下士之鱗集麇至。亦尚有如當時閎雅之徒。能操簡執觚。以從事於斯園與否。要之於凋謝凌夸之後。克復先疇。則冒氏不可謂無人。而馬氏以銖累變績。緝其殘敗。其卒也拱手讓之。以成其子若孫之志。是亦所謂一二賢豪間者。微冒氏之請。固不可以不記也。至於堂室之制。臺榭陂池之觀。則昔之記者詳矣。故不復書。

來青軒記

蒙自縣治之東偏。有屋三楹。曰來青軒。馬軒之由來舊矣。造作之日。月不可得而考。工匠之姓氏不可得而詳。其以來青名之者。前令醴陵李君也。其所以名者。舊有冬青樹大數圍者。斃焉。而李君更植之者也。今其先斃者既朽且爛。而李君所更植。則又繁然而成。陰樹當軒之中。其陰足以覆軒之半。曖曖然其延朝暉也。翳翳然其戀夕景也。盼之終日而忘其倦。故余於吏散衙退而燕息。必於是軒。青者東方之色也。於四時之序。為春。於卦之象。為震。其德為生。於氣化為萬物之始。易曰。天地解而雷

兩作雷雨作而百果草木皆甲拆青之象也。老子曰：衆人熙熙如登春臺，來青之象也。夫物之芑芑也，猶民之芸芸也。物生於春而成於夏，故陽氣畢達而草木暢茂，民生於天而育於人，故聖王之世，幼孤得遂長而老者以壽終，生者性也，有生者皆有性，復其性而生斯遂矣。奚獨一樹哉？且吾聞物之分芳者，物易附，故桂為靈宅，而柏為鬼廬，脆薄者，骨易竭，故槿則日及而桐必早零，冬青之柯葉能貫四時而不改意者，其所秉之質固厚，則其生也易遂，植之者將有取於是乎？雖然，我者培之，傾者覆之，聖人之訓也。枝葉未有害，本實先撥，詩人之所懲也。有雖腫盤錯之疾，則氣散而為癭矣。有支離疲茶之疾，則中喪而為癭矣。凡此皆治蒙者之所當知也。後之君子，其封植此樹，以無忘庸乎。

贈中憲大夫應山彭公墓碑銘

吾鄉對溪彭氏自南昀芝庭兩先生並以會試第一得狀頭，其後任京職外官，累蒙不絕。比自甲辰至己未，成進士者凡四人，皆出應山公後。公之卒年僅四十，即於卒之年十二月初七日葬於吳縣堯峰山柴場村時，諸孤皆幼，版石闕如，越合三十一。年長君持狀屬維熊補銘，讀之乃知厥嗣昌大，公實有以儲之，因樂以積善餘慶之理為天下告，不敢以不文辭。公性純篤，母宋夫人遺瘍疾，兩兄服官於外，公將瘞塗

藥侍疾半載無倦容。既而為夫人營葬事。廬墓積勞。遂得下血。痰屢發不止。復以芝
庭先生致政歸。恐遠溫清之節。遂絕意進取。先生哭公詩。有天許衰齡。親筆研南陔。
藉爾絮晨羞之句。蓋公之盡子職者如此。公於兄弟間。怡愉雖出處互殊。而友
愛不隔。遇諸兒子。自任所歸。尤撫教兼至。人有事託者。謀之必周。有借貸者。雖數不
以財置辭。其篤於昆弟朋友。又如此。少讀書。務博覽。喜與賓客飲。善奕。後忽自悔。日
閉戶誦論語。及朱子小學諸書。其督課諸子。更嚴而有法。公既歿。而諸子皆接踵臺
省。行成名立。人謂蒙養之端。傳之庭訓者多矣。公諱某。字與吉。應山。其號也。為蘇州
府學增廣生。貢太學。生於雍正十一年九月。卒於乾隆三十七年五月。曾祖定。求官
翰林院侍講。是為南昀先生。祖某。考啟豐。官兵部尚書。是為之庭先生。配錢太恭人。
於公之卒也。能辛勤撫孤。以終成教子之志。生於雍正九年十一月。卒於嘉慶五年
六月。是年十一月廿一日。合葬於公之墓。子六人。希濂。乾隆甲辰進士。刑部奉天司
郎中。希洛。丁未進士。福建道監察御史。祝華。候選州同知。希溱。丙午舉人。卒。希鄭。己
酉進士。禮部儀制司郎中。希榮。元和附貢生。嗣弟紹升。後女五人。俱適士族。孫男八
人。蘊輝。嘉慶己未進士。翰林院編修。蘊章。蘊孚。蘊辰。蘊達。蘊奎。蘊策。蘊恭。並幼。自乾
隆五十五年。暨嘉慶元年。四年。累遇 覃恩。以布濂官。贈公為中憲大夫。刑部奉天

司郎中加二級公承累世通顯之後兄弟皆登科第公獨以諸生終而子孫益昌大
聲諸養禾地美而不盡其力其收必倍理固然也然非有厚培之者惡能若是盛
哉銘曰

德修於家彌性而厚施報不喪慶章於後後人之慶前人之儲儲之不竭引之有餘
繼繼承承以康厥居

鹽法論

石韞玉

法久無不敵之理。鹽法至今日而敵已極考。今世官定引鹽之額。將及百年。此百年中生齒之繁。不啻十倍。而歲額不加增。是四海之衆。食官鹽者十之一。食私鹽者常十之九也。私鹽之價。其利即十倍於本。猶不及官鹽之價。則其利饒矣。私鹽之利。既饒。則閭閻無賴之徒。羣趨乎其中。官雖設厲禁以禁之。而卒不可禁。何也。私販之徒。富者出財。貧者出力。近海之地。動輒累千萬人。其強有力者。曰梟。平居以錢募窮乏之人。為之私販。而坐收其利。官遣兵役捕之。則潛遁無蹤。必欲索而得之。則聚眾拒捕。其人家藏兵器。雖鎗礮火藥皆有之。故兵役畏其強。而不敢問。其兵役之黠者。則又私受其賄。為之耳目。官之不肖者。或亦染指焉。至地方偶獲一販私之犯。例必窮詰其往來之迹。凡牧令失察過境者。皆有咎。故牧令亦以緝私為苦。而不樂為。如此而欲緝私以暢官引之銷。此必不可得之勢也。且閭閻無賴之徒。羣萃而州處。又擁厚利以資其生。欲其安分而不為非。亦不可久也。故曰鹽法。至此時而極敵也。今思為之變計。莫若廢綱商。而按窳以收其稅。夫鹽無論公與私。其源必出於窳。國家設鹽場。大使原以稽察窳戶也。然窳戶煎鹽以賣與官商。與賣私販之人。大使不得而知也。今若按窳計鹽。每窳歲煎鹽若干。則徵其稅若干。其稅額視綱商之額略

減焉以留餘力於窳戶。設有淫雨水溢之災。則確勦而豁免焉。如此立法。亦窳戶所樂從也。大使徵窳戶之稅。而納諸運庫。運使綜覈其數。而報諸鹽政。官制悉仍其舊。而毋容變置焉。此法立而無不稅之鹽。其課必有十倍於今之課者。經費既紓。則歲取於農民者。可量為裁損。此亦崇本抑末之道也。國家理財之術。未有善於此者也。彼商人謀利者。就窳戶市其鹽。東西南北聽其所之。而不問官無私販之禁。則兵役無需索之弊。牧令無處分之憂。鹽累亦化。良民無聚眾拒捕之禍。國家安人之術。亦未有善於此者也。頻年往來邦江之上。親夫牢盆為業者。每太息於調劑無策。乃作此論。以俟采風問俗者擇焉。

林和靖詩序

嘉慶丁卯冬。予自翰林編修解組歸田。寄居於杭城西南隅紫陽山下。時時出鳳山門行過萬松嶺。放小舟徜徉於六橋南北。或登孤山謁林處士祠堂。徘徊瞻望。想見其為人。辛未歲。感勤公以故相節制三江。予以舊吏徵入幕府。掌文案。同時有杭人周右為公司記室。携有和靖先生詩一冊。予借而讀之。心乎愛矣。不忍釋手。未幾感勤公內召入閣。賓客皆散。是詩仍歸周君。其後十年。周為江都宰。予寄信求。是書周遂錄副寄我。因授之梓人。或曰。漢魏六朝以來。詩人多如牛毛。之不可數。予無所刻。

而獨刻是編者何也。予曰：古今人詩不一格，有山林之詩，有臺閣之詩，臺閣之詩近於雅頌，山林之詩近於風。臺閣者以忠君愛國為玉，山林者以樂天知命為宗。詩如和靖先生殆孔子所謂知道者乎？夫宋室之興也，藝祖以神武之姿削平禍亂，再傳至真宗之世，海宇乂安，可謂小康矣。乃一念之侈，假託靈書，東封西禪，粉飾太平，流及宣政之間，崇尚元教，降天子之尊，而以道君自號，其禍遂至。父子客死，神州陸沈，誰為作俑者？迺流毒至於此極也。和靖先生當仁宗之世，窮居野處，蕭然物外，宜於當世事無所繫心者。乃臨終有詩云：茂陵他日求遺稿，猶喜曾無封禪書。憂深思遠，若逆料有靖康之禍者，苟非知道者，安能出此語？殆身在江湖而心存魏闕者歟？殆樂天知命而仍不忘忠君愛國之心者歟？曾子曰：人之將死，其言也善。先生斯語善之善者也。先生在臨江識李誥於疇人之中，而以公輔之器期之，學識如先生，殆亦抱公輔之林而未及施行者歟？而世之人往往以山林枯槁之士目之，是未可為知言者也。予愛其詩，論其世而知其人，故著鄙見如此，而即以為詩之序。

明王忠文公集序

明太祖之起江南也，獲佐命之士三人，曰劉基、曰宋濂、曰方孝孺。劉產青田，宋產浦江，方產臨海，皆在浙東。劉奇謀秘計，運籌帷幄，以成大功。宋侍從密勿之地，鼓吹休

明為一代文章冠冕。方則以剛大直養之氣抗節於成祖靖難之辰。躬罹慘毒。此三人者。清芬駿烈。彪蔚宇宙。至今鄉黨之人。俎豆之。方聞綴學之士。誦誦之下。至擔夫郵卒。婦人孺子。亦咨嗟而太息之。嗚呼。當是時。河岳英靈之氣。何曾萃一。若此其盛耶。古所謂五百年必有名世者。殆其人與。雖然。此三公而外。浙之東尚有鴻文偉行。孤忠勁節。卓然可傳者乎。曰有。則義烏忠文王公其人焉。公諱禕。字子充。家近華川。因以為號。少績學能文章。與宋景濂同受業於黃文獻之門。學成而元政不綱。天下已大亂。遂隱居青巖山中。術人齊琦見而驚曰。此興朝人物也。明革元命。應召署中書省掾。歷官至翰林待制。明祖嘗字而不名。奉命至雲南。諭招梁王。梁王持兩端未決。會元使脫脫至。自沙漠以危詞誚王。公遂遇害。建文初。諡文節。正統間。改諡忠文。噫。觀公行事。可不謂忠乎。觀公所著述。可不謂文乎。昔吾讀書。觀楚漢間事。鄒生為漢王說。容駝使諸侯。及楚漢相持。在成皐。葉洛間。生以三寸之舌。伏軾下齊七十餘城。忽淮陰侯兵至。遂為齊王所烹。至於陸生說尉佗。片言相合。如石投水。卒拜尉佗為越王。留飲數月。橐中裝千金歸報。漢拜太中大夫。以功名終。古人之遇。有幸有不幸。其相懸萬萬若此也。公之使於滇也。幸則如陸生。功成名遂。歸受賞於天子。不幸則如鄒生。搜不測之禍。踵頂糜爛。身死異域。此其成敗利鈍。皆天也。非人所能為。

也然孔門論士曰行己有恥使於四方不辱君命之二者雖成敗不同其知恥與不辱君命之義則一也若公者其出處似青田其文學似浦江其忠盡之節與正學先後輝映洵當時偉然一人傑矣哉吾獨怪造物者之生人也既予以輔世長民之材而顧不使與蕭曹房杜同享太平之福而乃令其與世侷僚方以身殉主劉為奸人所毒宋亦幽憂竄謫遠方以死如公者僅僅殺身成仁博禮官一諡豈明之少恩乎抑天果不欲以庸庸之福相待豪傑之士耶論至此又不得不為之三歎也公有集二十五卷鏤板行世久矣經風霜兵燹之餘不無殘闕失次其後裔釀金修之索序於余夫表章先賢後死者之責也余烏敢辭

重修義烏縣忠孝義祠記

古云十步之內必有芳草十室之邑必有忠信自古秀民善士不擇地而生然遐陬僻壤往往寂寞無聞者非無人也無人振起之也義烏地分婺女之次今隸金華府秦時有孝子顏烏葬其親羣鳥銜土來助縣之得名由此始唐則有賂賓王為臨川尉從徐敬業起兵討武曩之亂事雖不成義烈之氣炳然宇宙所草檄三尺童子至今尚能誦之宋則有忠簡公宗澤當靖康之難守磁州高宗潛龍在淵將赴金營過磁公逗留之遂啟南渡中興之業而公留守汴京招集天下勤王兵誓師渡河請高

宗回鑿圖恢復之計。疏至二十四上。為黃潛善注伯彥所油發憤疽生於背而卒。然終公之世。金人不再犯汴京。惟公保障之力。此三人者。皆古今不世出之人。皆為義烏所產。則是邦之風俗人心。固有勝於通都大邑者矣。嘉慶戊辰。余長子同福。奉上官檄。權知縣事。請宰縣之術。余曰。縣令民之牧人也。錢穀賦稅。惟令是徵。刑罰訟獄。惟令是聽。諾茲除暴。惟令是責。水旱凶荒。惟令是咨。令之為職。甚重矣。然皆世俗所能為也。古之所謂循良吏。惟在能教養斯民。吾聞義烏人。務農桑。善藝植。地居溪山之閒。水旱不為災。兩歲耕則有三歲之食。又土產棗榴。園林之利。歲入二三十萬錢。斯民固能自養矣。官斯土者。其以教為先務歟。同福既至官。邑人請曰。縣舊有忠孝義祠。建於雍正五年。載在祀典者五十人。歲久浸廢。棟宇傾頽。庭祀無祿。不治懼無以妥神靈。而昭紳嚮。願及時修復之。於是鳩工庀材。繕宇算牆。四郊聞風。踴躍襄業。既成。同福率邑之士。落之。而請余為記。余曰。善夫。此即景余所云教之一端也。夫教莫先於風俗。風俗之美。莫重乎忠與孝。與義也。忠孝義稟諸天性。激而發之。則人也。忠如宗澤。孝如顏烏。義如駱賓王。固古今不世出之人矣。今之人猶古也。曠世相感。當亦有聞風而興起者耶。風俗人心之美。當亦有不待教而成者耶。甯惟是官斯土者。樂與觀成。亦采風問俗者。所聞而嘉歎者也。余不敏。方待罪史館。宣教化勵風俗。

博史職也。故書其辭於麗牲之石。以告方來。

四川欽永同知周君墓誌銘

蜀於中國在西北邊徼。二百年來。數有兵事。故文武官吏。從事行間者不少其人。或飛芻挽粟。或磨盾草檄。皆以功名顯。然馳驅萬里之外。俾荒服之人。得聞中國聖人之教。而變其俗。則勗齋周君有足多焉。君諱明德。字某。勗齋其自號也。先世家於吳門。曾祖敬侯。祖維新。皆太學生。父大倫。候選縣丞。君以祖若父游幕泗州。因家於盱眙。君幼好讀書。十二能詩。十三學為文。年二十。歸蘇州。南北鄉試。皆不售。以四庫館勝錄。議欽縣丞。發四川試用。時金川平定。京兵凱旋。君即奉檄辦理回兵差務。欽勞加一級。西域之用兵也。君隨大帥至兩藏。辦理軍務。西域之俗。人死不葬。而燔其肉。以喂鷹犬。雖人子於父母。皆然。君請於駐藏大臣尚書和琳。出示嚴禁。並指荒山。以為義塚。美民感動。其俗遂革。西域人向不出痘。間有一二。即拋棄山谷。以避沾染。君又請於和。設立醫局。藥餌。凡有嬰孩出痘者。即送局調治。由是保全甚多。夫人孝慈之心。稟於天性。而殊方絕域。未聞中國聖人之教。遂至鬻割其親。而不知非。棄捐其子。而不知惜。君因利乘便。使數十年之惡俗。一朝而革。其有造於斯人。為何如。君歷官多政績。不勝書述。其大者。以示後人。君官至四川欽永直隸同知。援例改六部員

外郎未赴官於嘉慶六年告歸時年纔五十二亦可為急流勇退者矣在林下優游二十餘年道光三年卒於里第春秋七十有四配王氏淑慎持家言不出閭朱於嘉慶二十四年卒孤子冕卜於道光五年十月朔日奉二親柩合葬於長洲八都上七圖海淡字圩白坊之原索予銘其墓予與君同官於蜀知君行事稔因敘其生平大略而為之銘曰

偉哉周君人中豪服官不憚勞人勞馳驅萬里行荒僻佩刀囊筆隨旂旆運籌帷幄參戎輻視彼荒服如同胞移風易俗惠澤饒愷愷大雅德音昭佳城鬱鬱宰木高銘茲幽宅非過褒

剛柔篇

洪亮吉

世傳老子見舌而知守柔。而以為柔之道遠勝剛。非也。老子之言曰：齒堅則先弊。舌柔是以存。不知一人之身。骨幹最剛。肉與舌其柔者也。人而委化。則肉與舌先消。而後及齒與骨。是則齒與骨在之時。而舌與肉已不存矣。老子存亡先後之說。非臨沒時之謬論乎。不特此也。以天地之大言之。山剛而水柔。未聞山之剛先水而消滅也。以物之一體言之。則枝葉柔而本剛。未聞本之先枝葉搖落也。且天不剛無以制星辰日月。地不剛無以制五嶽四瀉。人不剛無以制百骸四體。孔子曰：吾未見剛者。又曰：剛毅木訥近仁。孟子曰：其為氣也。至大至剛。剛之德可貴如此。而守柔之說何為乎。且日有剛有柔。未聞人以剛日出則凶。柔日出則吉也。人之性有剛有柔。未聞剛者常得凶。而柔者常得吉也。語有之：蓬蔕之人。口柔。蔕施之人。面柔。夸毗之人。體柔。使柔而得吉。則蓬蔕蔕施之人。攸往咸宜矣。而不然也。老子號有道者。豈為此不然之論。以誑世乎。此蓋道家者流。託為老子之言。以自售其脂韋頤泰之術耳。何以見之。說苑云：韓平子問叔向曰：剛與軟孰堅。對曰：臣年八十。齒再墮。而舌尚存。若以時論之。叔向尚在老子之前。必不反引老子之說。以為說明矣。明僞有是言。而道家者流。竊其說以欺世。又託之於老子。竝託之於商容。皆不足信者也。若必曰柔

可勝剛則吾甯為龍泉太阿而折。必不為游藤引蔓以長存者矣。

守令篇

守令親民之官也。一守賢則千里受其福。一令賢則百里受其福。然則為守令者。豈別有異術乎。亦惟視守令之居心而已。往吾未成童。侍大父及父時。見里中有為守令者。戚友慰勉之。必代為之慮曰。此缺繁。此缺簡。此缺號。不易治。未聞及其他也。及弱冠之後。未入仕之前。二三十年之中。風俗趨向頓改。見里中有為守令者。戚友慰勉之。亦必代為慮曰。此缺出息若干。此缺應酬若干。此缺一歲之可入己者若干。而所謂民生吏治者。不復挂之齒頰矣。於是為守令者。其心思慮親戚朋友妻子兄弟。奴僕媪保。於得缺之時。又各揣其肥瘠。及相率抵任矣。守令之心。思不在民也。必先問一歲之陋規若何。屬員之饋遺若何。錢糧稅務之贏餘若何。而所謂妻子兄弟親戚朋友。奴僕媪保者。又各挾谿壑難滿之欲。助之以謀利。於是不幸一歲而守令數易。而部內之屬員。轄下之富商大賈。以迄小民。已重困矣。其間即有稍知自愛。及實能為民計者。十不能一二也。此一二二人者。又常被七八人者。笑以為迂。以為拙。以為不善自為謀。而大吏之視一二二人者。亦覺其不合時宜。不中程度。不幸而有公過。則去之。亦惟慮不速。是一二人之勢。不至歸於七八人之所為不止。且有為今日之

守令。而并欲銷三十年以前守令之無術者。然吾又嘗驗之。三十年以前守令之拙者。滿任而歸。或罷任而反。其贏餘雖不多。然恒足以溫飽數世。今則不然。連十舸盈百車所得。未嘗不十倍於前也。而不十年不五年。及其身已不能支矣。無待其子孫也。則豈前之拙者誠拙。而今之巧者誠巧乎。亦居心做有不同者乎。

珥塘荆氏族譜序

風俗之媿惡。由於士大夫。其端不出乎上也。亦不出乎下也。東漢風俗之媿。士大夫有以致之。西漢風俗之薄。亦士大夫有以致之。其由於士大夫何。蓋治天下未有無法者也。治天下之有法。必自士大夫之各修其家法始。故觀一世之治亂。以風俗之媿惡卜之。風俗之媿惡。又以士大夫之家法修與不修為斷。家法壞則害及於國矣。害極於天下矣。士大夫之家法。轉移風俗之具也。范滂之母。以令名勗其子。樂羊之婦。以不義揚其姑。風俗所以美也。迨正始之後。有居喪食烝豚者矣。有直斥其父之名而謾罵者矣。名家則不修叔父之敬。官族則世無渭陽之情。陵夷衰微。以致為人。心世道之患。則風俗之薄為之也。丹陽珥塘荆氏。自漢三國以來。即為名族。迄今已二千年。而讀書敦行之士。代常數十輩。其故何耶。譜系之修舉。家法之嚴明。百倍於他族故也。其合族之法。曰善惡有別。貴賤有等。夫善惡有別。則父日以戒其子。兄日

以戒其弟而不肖之子弟無所容身矣。貴賤有等則富者或寬博乎世貧者反章服耀身。父日以勉其子妻日以勉其夫而偷便安喜遊竊之子弟幾無以自立矣。其法行之二千年而不壞故荆氏之門地才望常為他族冠蓋一家無偷便安喜遊竊及不肖之子弟不過一家之故耳。使推其法行之而一州一邑及於天下可無秀民矣。一州一邑及天下無秀民而尚有作不靖以干國紀者乎。吾故曰家法之詳國法之所以簡也。余與荆氏有連又幼嘗受經於華亭教諭荆先生汝翼故知其家法甚詳。則今之序雖由於荆氏之請然豈僅為荆氏一族言之乎。推之於他族而可推之於天下而可。

錢大令維喬詩序

余幼耽吟詠未成童日即識里中詩人三曰陳廷賓曰湯遵路曰錢季木時三人者詩名已噪。余甫學吟未敢遽定其優劣也。三十後交道漸廣學識亦粗進因悉取三人者之詩而合觀之。廷賓能頌習古人矣。顧自為詩及不能學古人。遵路能學古人矣。而未能盡化古人之蹊徑也。獨季木才最高。五言法魏晉六朝歌行則自初唐以迄北宋諸家無不涉歷。近體則尤近大歷十子。雖心摩古人而於古人之外別有一種幽奇靈秀之氣耐人尋味。余尤心折之。年益長交益深季木所為詩亦益富及四

十後季木已以名孝廉出宰浙中數縣。遽有日矣。忽謝病歸。築室邦溪之北。名曰半園之半。乃過從未及數月。余即入都。嗣官京師者十年。季木之音問時至。詩頗不多。親也。歲戊午。余以第喪乞假歸。在里中。八閱月。與季木過從尤密。亦時時觀季木之詩。季木亦時時言欲綜理前後所作。乞余訂定之。而余又以奔國郵入都矣。不半歲。以語言愚黷部議殊死。

聖天子寬其要領之誅。成之絕域。即日押出。國門時。余在請室中。縲紲偏身。役車又敦促上。遑匆猝未暇念及妻子也。獨割讞案紙尾。疾作書寄季木。與孫兵備季木。與之訣別。聞季木得余書。痛哭失聲。時時走余家問消息。及余抵戍所。甫一日。即得季木書。於患難中。申之以婚姻。所以慰戒之者。無不在。在戍所三閱月。凡三得季木書。而余已蒙恩放里矣。季木於友朋死生離合之際。不忍相負如此。然後知季木詩之工。季木性情之摯為之也。嗚呼。人惟性情不摯。故遇事輒持兩端。甚或幸人之急。而排擠之。訕笑之。以自明涉世之工。否則自詡為深識。遠見。以為固早慮其有此。此其人亦何嘗不為詩文。然要皆揣摩世故之談。影響游移之語。求其能頌習古人者。已十不得一矣。況能學古人而得其似乎。學古人而得其似。已百不得一矣。況能於古人之外。別具心手乎。此季木詩之所以可貴。而予之序季木詩。綜覽平生。不禁

其悲善之交集也。李木近頗學釋道兩家。他日所為詩。或稍雜道流禪悅之語。然此非李木詩之至也。故予序李木詩。亦以己未以前為斷云。

重修明太常少卿凌公祠墓碑記

吾嘗作續吳地家墓志。載黎里鎮有明太常寺少卿凌信墓。墓旁有扁名寶綸。即凌公祠屋也。舊藏宣德時所給勅命。及成化時賜諭祭葬之文。故庵以名焉。厥後子姓凌替。日益傾圮。一修於萬曆丁巳。同里胡居士元。再修於崇正辛巳。龔居士濟。襄并為置祠田。繕庖廬。迄今又一百五十年。田常於住持僧某。碑磨於遊方僧某。其僅存之子姓。亦無有過而問者。徐待詔達源。見而慨然。謀於里人。并太常之父。明工部虞衡司主事凌顯祠墓。亦並修葺。工始於嘉慶六年。至七年秋。甫竣。將立碑。以永其傳。以碑文屬亮吉。亮吉攷明史暨一統志。江南通志。凌公事蹟。無所著錄。惟吳江縣舊志。載凌顯黎里鎮人。字彥光。考授大興縣丞。欽給勅命。陞工部主事。後以子信貴。贈尚寶司丞。凌信字尚義。以楷書授中書。仕至太常少卿。及閱明史。安南列傳。載憲宗踐祚。命尚寶卿凌信行人。邵震賜王黎灑及妃彩幣。灑遂遣使入貢。是凌公未官太常以前。又嘗為尚寶卿。並出使遠國也。夫宣德成化。為有明極盛之時。公以善書。遂得致位卿貳。與華亭之沈度及弟棨。皆以楷書選入翰林。凡金版玉冊。皆令書之。

其致身通顯亦與太常等稱雲間大小沈學士云。以是知士生承平。凡有一藝之長無不可濯磨自見。太常與二沈均可云。遇其時矣。又嘗憶

今天子嘉慶四年。亮吉尚在翰林。適琉球國王以嗣位乞封於朝。掌院事者將舉亮吉。以往後值他事不果。亦可知當國家重熙累洽之時。持天子節。越大海。使萬里遠國。得以紀其風土人物。備一代掌故。亦有命存其間。固不可幸致耶。凌公之由尚寶卿。得權太常。或即以出使故。未可知也。總之凌公之生。獲以才自奮。其沒也。歷數百年。祠與墓。又頻見修於里中之後。進使人過太常之阡。訪寶綸之庵。尚流連往復不置。謂非身前後之遭際。均有過於人者乎。亮吉既重待詔之能。表章先哲。又慮凌公父子事蹟久而就湮也。故樂為記之。

祝貞女傳

貞女祝氏。世居海甯之袁花里。父某諸生。母朱氏。女行四。幼端嚴。寡言笑。稍長。讀書通大義。遇古人節烈事。必手抄成帙。時諷咏之。鉞字海鹽徐生。杵生勤學。得瘵疾。纏綿數年卒。訃至。父母知女性烈。秘不以聞。忽一日。閉戶飲泣。父母啟扇入。女哽咽曰。徐郎死矣。昨亦夢於女。以不得入祠為恨。父母能如女願。當往成。徐郎志。否則從此絕粒矣。兄弟輩百方勸慰。女惟俯首啜泣。乃往告徐。徐初難之。姑盛然曰。有婦如此。

而使之齋恨以終乎。遂誠以成禮。於庚子三月歸徐。女時年二十七。距生歿已三年矣。登堂拜姑後。奉主入祠。布衣蔬食。儼然未亡人也。女事姑孝。姑謂人曰。我得此婦。二郎若不死。姑遺疾。女醫。梅周效。含殮畢。屢欲引決。有宗長謂之曰。婦之來為夫計也。今兩世未葬。嗣子未立。遽捐生如死者何。始收涕謝之。徐家故貧。女與伯叔析居。受瘠田三十畝。多浮糧。遇儉歲。饘粥恆不給。女性勤儉。至是為窶。窶計晝夜操作。指為之餼。明年冬歸奉母病。不解帶者三月。母歿。哀毀盡禮。女念父老多疾。留侍養。逢時節及諱日。始住家祭祀。亦時迎父於家。敬奉之。幼縱浣濯。不假手他人。越四載。以父病歸侍。室內無人。偷兒穴垣入。空所儲去。女聞之。號曰。天乎。是十指所積。欲為舅姑與夫營兆者也。旋居父喪。女以痛父故。且念貲盡失。葬無所措。悲憤成疾。疾稍間。又念年力尚壯。或可復圖。力疾強起。用益節。作益勤。雖困頓不恤。久之。戚黨見女憔悴甚。規以攝生。且即欲為立嗣。女曰。壽天命也。婦職未盡。何以子為。作不輟。癸丑秋。積勞成疾。瀕死者數。少瘥。詢悉醫藥費所耗。殆盡。懊恨見於辭色。初女得生。遺像懸諸房。日夕焚香。病時為人所碎。見益悲慟。是冬以哭第歸。怔忡大作。泣謂所親曰。女不天。所隱忍至今者。為兩世遺骸計也。門內無人相助者。惟兄弟。弟今第又天死。兄復旅食。頻年手口所營。一空於盜。再耗於病。羸體又不任勞作。是天不欲我襄大事也。

但恨辜負此十餘年耳。素蓄一婢。至是遣去。惟子身焉。蓋自裁之計決矣。嗣後疾痛無虛日。丙辰春。女自知力不支。欲鬻產營葬。衆尼之。不果成。三月杪。絕粒八日不死。至夜投繯而絕。女生於乾隆十九年八月十五日。歿於嘉慶元年四月初四日。得年四十三歲。嗣子一名鳴珂。方三歲。女歿後所立叔子也。

史氏曰。貞女之死。可云從容就義矣。其不死於夫。為舅姑也。不死於舅姑。為葬舅姑及夫也。至所積之資。一耗於賊。一耗於病。內外親又零落殆盡。而貞女不得不死矣。嘗讀南史孝義傳。諸暨東沔里屠氏女。孝養父母。及父母卒。女以無兄弟。誓守墳墓。不嫁。為山劫所殺。貞女之死。一何其相類乎。卒能感族人為營葬立嗣。則徐氏一宗。非貞女幾幾不血食矣。志定於中。而嗣延於世。所繫豈淺鮮哉。

湖北呂堰驛巡檢王君神道表

乾隆六十年十二月。余視學貴州。還京。以小除日抵湖北之呂堰。曠黑中有迎拜馬首者。余起驚詢。則吾友王君芑孫之弟呂堰驛巡檢王翼孫。既抵館。揖之入。其所言皆民間疾苦。與差務絡繹。貌憔悴而公服破壞。余悚然異之。已復出其寄兄芑孫之書。與一文。梅余恣其官貧。出囊中金持贈。以別。行數驛。作書與湖北大吏言君之賢。大吏復書云。君頗直。屢忤上官。上官及其同官無悅之者。余又為爽然不擇者久之。

越五月得芝孫書則君以禦賊不屈死矣。方嘉慶元年正月湖北逆民猝起於是鄂陽荊州宜昌施南諸府州縣所在如蝟毛襄陽府屬南漳等縣亦相應而起。呂堰當南北之衝無城郭可守。君日夜焦灼啓上官求學畫皆不報。君不得已自起行村鎮為畫守禦策時縣中官吏捕邪教嚴株及里黨一方囂然具擔索欲移徙君急慰止之。揭榜曉示俾耕種如常。會賊已起襄陽之黃龍瑞君預立備賊章程八條。一凡鄉勇十名設頭目一人頭目十人設總頭目各相轄而統於巡檢司。一附近小村口戶單弱悉遷呂堰鎮。一鄉勇能自食者聽其無食之人為設飯餼立糧餉。總頭目司其事。他若擅自遷徙及飲酒賭博皆有厲禁。部署甫定賊大至攻呂堰。三月廿九日君出迎擊禽賊目劉方達劉漢德陳起蛟三人縛斬驛前。又自作官文書詣當事告急。然賊勢益盛。君所部寡弱度不可守乃作書別父兄付弓兵劉祿持去。且便取巡檢司印上府。又令從人徐升間道行而身上大橋罵賊頃之復令小吏廖之義趣劉祿之義走已數步見賊已過橋有數賊方環視橋下之義意君已投河死遂跳免。比賊退之義還見橋下沙塵露衣乃君迎擊賊時所著。繼襄陽知府跡徐升至辨認亦如之義言。八月某日賊再陷呂堰領兵者從賊手殺君巡檢司印。賊目俞宗武自言親殺驛官且言驛官從橋上獨身接戰連刃數人既中矛創甚自投於水賊眾憤鉤

出之并褫其衣刀梨叢集猶罵不絕口乃死君死節事至是乃大白然前此或傳君已死或以為未死而余則斷斷然必君之死蓋立談數刻而見君之性定也自君死賊過呂堰無不顛眩若有躡之者輒驚曰此巡檢君之靈為立廟羅拜乃去或曰君遺骸亦賊所營葬則君族弟仲光至呂堰訪問所得也事聞有旨入昭忠祠依縣丞例議卹又視四品以下世襲雲騎尉襲次完更襲恩騎尉周替朝廷所以報死節之臣可云厚矣嗚呼君一巡檢耳感事之周臨命之定如此然則大吏守天子封疆而數百驂起為合未定之賊任其往來豕突化為萬千蔓延無已以致傷我實心任事之吏與守死不去之民及事已過或又以輕敵債事之咎委之則平日以君為慙以君為忤上官者宜也又吾聞湖北之宜昌四川之達州逆民起事之始皆因州縣逼進藉此逃死而君以一巡檢獨善拊循其民無事則勸之耕桑有事則偕為守禦至危苦萬狀而民卒不忍舍去迨君死而一鎮之民死於賊死於路死於饑寒者亦遂無噍類嗚呼君可謂賢也已且大吏不能禦賊而巡檢禦賊大吏能遷延避賊而巡檢獨當賊之衝日夜投賊奮不顧身乃力竭而為賊所殺此奇節也亦僅事也余為

天子史臣而不能傳奇節志僅事則不稱職是懼故因君兄芑孫之請而為直書之

以揭諸其壘又幸余之尚友識君并尚能斷君之必死也若君平日行事以迄世系生卒歲月詳秦兵備藏與君兄也孫所為行實及狀中不更贅

徐秋涓繫事表序

李膺云

秀水徐秋涓先生踵姚江黃氏歷代甲子考為繫事表十卷始黃帝元年終明崇禎十七年為七十三甲子又三之一書成藏於家令子壽圖上舍欲刊行之介車學博半枚句余為敘余惟歷代甲子考為編年之體而繫事為表則又似合紀傳編年為一手者昔劉杲答王僧孺譜之問引桓譚新論太史公三代世表竝效周譜僧孺歎為得所未聞顧自孟堅而後諸史之表闕如伏元忌黃景之諸王王子功臣恩澤侯表邊韶崔實延篤之百官表作矣而不傳袁布之之漢表熊方之後漢表李善之歷代宰相年表補前人之闕矣而未備吾知其難也至如紀年之書若稽古錄後永嘉朱氏紀年備遺削去呂后王莽曹魏武后朱梁諸紀年義理所會無偏駁之說善矣至如鍾氏廣漢撰建元考萬氏年表撰紀年彙考摭拾可為賅備然鍾氏遠紀外域而皇越昌符之鍾流在康州反未之及萬氏博極羣書而天寶寶大之石近在吳越轉末之收則疑年抑又難者况綜古今數千百年而約數千百卷之史以經緯其間則其難有數倍於作一史之表者今此書鉤元提要以斜上旁行之格寫條舉件繫之勤舉諸史才所未成者而成之秋涓先生之學大矣壽圖雅材好古善讀遺書尚其亟付鐫行以為諸史者之圭臬可乎

重修汀州府學碑記

汀州於唐而學肇於宋至 國朝地凡三徙迨乾隆十有四年嘗增修焉而規制狹隘朽壞已甚厥後重修之役是在嘉慶九年蓋前太守興義李君明心實倡之勸輸庀材鳩工閱十三年之久至今始蒞陳襄其視舊制而增改者則為 大成殿基進四大有奇高盈尺於前為露臺為戟門戟門之左右為名宦鄉賢二祠祠之下為甓池為櫺星門門之外舊為路今改而圍之為宮牆殿之後為 崇聖祠為祭器樂器所祠之左為兩校官署兩署之間傑出者為尊經閣閣之前為明倫堂堂之外為土地祠為省牲所翼然於橫舍之左者為文昌祠聳然於東城之上高類一郡者為魁星閣欣然樂施而俎而豆之者為捐輸之人題名所八邑之所曾萃以底於成者計銀三萬四千五百兩有奇董厥役而始終之者為某某等其大凡也凡鼎之占據以牟利者輒如其直予之既不斂小人之怨而學之舊基胥復輪焉焉規撫乃得大備於是郡之賢士大夫旬余一言以志其事余聞班固有言曰古之學者耕且養三年而通一藝是故用日少而蓄德多自漢以後雜學支離末學膚淺求其通經以致用者蓋亦尠矣有宋諸儒發明性理之說粹然一出於正而承其流者或以空虛傲眇為學潛墮於真端而不自覺而於聖賢所謂孝弟忠信禮義廉恥之道離經辨志

敬業樂羣之教切於倫常日用之事者反視為淺近不足務由是人心日滿而風俗亦泯汀雖山國僻在一隅然先輩中如黎魏曾雷貫一諸先生或以理學或以文章政事卓然可傳流風未遠有志之士能毋感乎是非無昧乎邪正修身踐行以植其基銘文碩學以致其用將以為聖賢根本之學且彰

聖朝治化之隆者安知今之不如昔哉余願汀之諸生毋僅以科名利祿之見存於中也

徐州府學教授王公墓誌銘

父執易圃王先生既就養於令子進祖西平官舍之六年也一旦萌歸思西平性最孝亟乞假身候代而屬其兄述祖及婦子輩先生歸以嘉慶丙寅八月至家明年三月無疾而逝於是年八十矣配何顏兩宜人先卒已葬兩令子將以臘月之吉啓生藏而定焉先期來自廣芸為志墓之文廣芸未嘗學古文何足以銘先生願西平兄弟不求之朝貴而以屬風塵俗吏者蓋以兩世交誼知之深言之為可信也則其銘先生也固宜憶乾隆戊子秋廣芸侍先大夫入都始識先生一日過寓舍先大夫以廣芸課文示先生曰孺子何如曰可教也時廣芸才十六歲再逾年而先大夫見背廣芸備歷艱苦與西平兄弟先後同應童子試後倖忝科第出為令十餘年來

濼膺郡符而髮白齒落頽然一翁自先生沒後先大夫之友蓋無一存者矣嗚呼其
忍銘吾先生哉先生幼慧九歲父命賦萬壽菊詩奇之嘗以松花石硯硯為

仁廟賜先大父物也及長遂以詩名大江南北詩人林立皆推先生執牛耳然先生
行誼有古君子之風其居心行事無浮薄之習不當以詩人目之也往來京師就試
者廿年從不行卷于貴人學日進品日粹名亦日重衍聖公聘為子嗣公憲培師
在曲阜者四年大學士公阿文成公亦延以教公孫侍郎尚書兩公是也其餘所成
就後進甚夥年及艾始登一第遂就學職不得以政事表見然每每佐有司勦災散
賑捕蝗必盡心力為之嘗奉檄勸沛縣太行隄戊夜水潰隄入城乃佐令集漁舟以
拯居民所活者甚眾後先生就養西平尤以加意矜恤獄囚為訓先生之經濟於此
略見端倪若夫建家廟輯宗譜施樂餌之類猶其小節耳按狀先生諱元勳字叔華
初字秀峰號東溟又號冲成子晚號易園居士以國子生中乾隆丁酉順天舉人戊
戌進士任徐州府儒學教授以子進祖官封奉直大夫西平縣知縣加三級先世在
宋自北遷南居崑山為望族有介山公諱芬者始遷嘉定九傳為貞憲先生諱泰際
明崇禎癸未進士入國朝不仕是為先生之本生高祖考曾祖考諱楫汝順治辛
卯舉人祖考諱晦康熙壬辰進士翰林院庶吉士考諱思渠國子生以先生官贈文

林即元配何繼配顏均贈宜人子男二長述祖監生候選五城兵馬司次進祖乾隆
己酉舉人癸丑進士西平縣知縣女一適隨州州同姚元娘孫男五人女四人所著
易圖詩鈔三十卷琴版行世又古文六卷代撰經進詩文摩金集四卷樵玉山房詞
彙四卷秀華山人詞彙二卷歸田吟彙二卷藏於家以嘉慶十二年十二月十八日
葬於寶山縣宙號三十九圖譚家灣先茔昭穴銘曰

太原玉邑石族百餘年科十六吉士興修撰績公晚遇甘旨菴享大年食子祿惟有
德通基福後益昌理可卜

復禮上

凌廷堪

夫人之所受於天者性也。性之所固有者善也。所以復其善者學也。所以貫其學者禮也。是故聖人之遵一禮而已矣。孟子曰：契為司徒，教以人倫。父子有親，君臣有義，夫婦有別，長幼有序，朋友有信。此五者皆吾性之所固有者也。聖人知其然也，因父子之道而制為士冠之禮，因君臣之遠而制為聘覲之禮，因夫婦之遠而制為士昏之禮，因長幼之遠而制為鄉飲酒之禮，因朋友之遠而制為士相見之禮。自元子以至於庶人，少而習焉，長而安焉，禮之外別無所謂學也。夫性具於生初，而情則緣性而有者也。性本至中，而情則不能無過不及之偏。非禮以節之，則何以復其性焉？父子當親也，君臣當義也，夫婦當別也，長幼當序也，朋友當信也。五者根於性者也。所謂人倫也。而其所以親之義、別之序、信之則，必由乎情以達焉者也。非禮以節之，則過者或溢於情，而不及者則漠焉遇之。故曰：喜怒哀樂之未發，謂之中。發而皆中節，謂之和。其中節也，非自能中節也，必有禮以節之。故曰：非禮何以復其性焉？是故知父子之當親也，則為醴醢祝字之文以達焉；其禮非士冠可賅也。而於士冠焉，始之知君臣之當義也，則為堂廉拜稽之文以達焉；其禮非聘覲可賅也。而於聘覲焉，始之知夫婦之當別也，則為笄次悅擊之文以達焉；其禮非士昏可賅也。而於士

昏焉始之知長幼之當序也則為盥洗酬酢之文以達焉其禮非鄉飲酒可賅也而於鄉飲酒焉始之知朋友之當信也則為雉牯奠授之文以達焉其禮非士相見可賅也而於士相見焉始之記曰禮儀三百威儀三千其事蓋不僅父子君臣夫婦長幼朋友也即其大者而推之而百行舉不外乎是矣其篇亦不僅士冠聘覲士昏鄉飲酒士相見也即其存者而推之而五禮舉不外乎是矣良金之在井也非築氏之鎔鑄不能為削焉非臬氏之模範不能為量焉良材之在山也非輪人之規矩不能為較焉非輅人之繩墨不能為輅焉禮之於性也亦猶是而已矣如曰舍禮而可以復性也是金之為削為量不必待鎔鑄模範也材之為較為輅不必待規矩繩墨也如曰舍禮而可以復性也必如釋氏之幽深微眇而後可若猶是聖人之道也則舍禮奚由哉蓋性至隱也而禮則見焉者也性至微也而禮則顯焉者也故曰莫見乎隱莫顯乎微故君子慎其獨也三代盛王之時上以禮為教也下以禮為學也君子學士冠之禮自三加以至於受醴而父子之親油然而矣學聘覲之禮自受玉以至於親勞而君臣之義秩然矣學士昏之禮自親迎以至於徹饌成禮而夫婦之別判然矣學鄉飲酒之禮自始獻以至於無算爵而長幼之序井然矣學士相見之禮自初見執贄以至於既見還贄而朋友之信昭然矣蓋至天下無一人不囿於禮無一事

不依於禮循循焉日以復其性於禮而不自知也。劉康公曰：民受天地之中以生，所謂命也。是以有動作禮義威儀之則，以定命也。故曰：天命之謂性，率性之謂道，修道之謂教。夫其所謂教者，禮也。即父子有親，君臣有義，夫婦有別，長幼有序，朋友有信，是也。故曰：學則三代共之，皆所以明人倫也。

復禮中

記曰：仁者人也，親親為大，義者宜也，尊賢為大，親親之殺，尊賢之等。禮所生也。此仁與義不易之解也。又曰：君臣也，父子也，夫婦也，昆弟也，朋友之交也。五者天下之達道也。知仁勇三者，天下之達德也。此道與德不易之解也。不必舍此而別求新說也。夫人之所以為人者，仁而已矣。凡天屬之親，則親之，從其本也。故曰：仁者人也，親親為大。亦有非天屬之親，而其人為賢者，則尊之，從其宜也。故曰：義者宜也，尊賢為大。以喪服之制論之，昆弟親也，從父昆弟則次之，從祖昆弟又次之，故昆弟之服則疏。衰裳齊期，從父昆弟之服則大功，布衰裳九月，從祖昆弟之服則小功，布衰裳五月，所謂親親之殺也。以鄉飲酒之制論之，其賓賢也，其介則次之，其眾賓又次之，故獻賓則分階，其俎用肩，獻介則共階，其俎用胙，賂獻眾賓則其長升受，有薦而無俎，所謂尊賢之等也。皆聖人所制之禮也。故曰：親親之殺，尊賢之等，禮所生也。親親之殺。

仁中之義也。尊賢之等。義中之義也。是故義因仁而後生。禮因義而後生。故曰君子
 義以為質。禮以行之。孫以出之。信以成之。禮運曰。禮也者。義之實也。協諸義而協。則
 禮雖先。王未之有。可以義起也。郊特牲曰。父子親然後義生。義生然後禮作。董子曰。
 漸民以仁。摩民以義。節民以禮。然則禮也者。所以制仁義之中也。故至親可以捨義。
 而大義亦可以滅親。後儒不知往往於仁外求義。復於義外求禮。是不識仁。且不識
 義矣。烏覩先王制禮之大原哉。是故以昆弟之服。服從父昆弟。從祖昆弟。以獻賓之禮。
 禮獻介獻衆賓。則謂之過。以從祖昆弟。從父昆弟之服。服昆弟。以獻介獻衆賓之禮。
 獻賓。則謂之不及。蓋聖人制之而執其中。君子行之而協於中。庶幾無過不及之差。
 焉。夫聖人之制禮也。本於君臣父子夫婦昆弟朋友五者。皆為斯人所共由。故曰道
 者。所由適於治之路也。天下之達道是也。若舍禮而別求所謂道者。則沓泐而不可
 憑矣。而君子之行禮也。本之知仁勇三者。皆為斯人所同得。故曰德者得也。天下之
 達德是也。若舍禮而別求所謂德者。則虛懸而無所據矣。蓋道無跡也。必緣禮而著
 見。而制禮者以之。德無象也。必藉禮為依歸。而行禮者以之。故曰苟不至德。至道不
 凝焉。是故禮也者。不獨大經大法。志本夫天命民彝而出之。即一器數之微。一儀節
 之細。莫不各有精義。彌綸於其間。所謂物有本末。事有終始。是也。格物者。格此也。禮

器一篇皆格物之學也若泛指天下之物有終身不能盡識者矣蓋必先習其器數
儀節然後知禮之原於性所謂致知也知其原於性然後行之出於誠所謂誠意也
若舍禮而言誠意則正心不當在誠意之後矣記曰自天子以至於庶人壹是皆以
修身為本又曰非禮不動所以修身也又曰修身以道修道以仁即就仁義而申言
之曰禮所生也是道實禮也然則修身為本者禮而已矣蓋修身為平天下之本而
禮又為修身之本也後儒置子思之言不問乃別求所謂仁義道德者於禮則視為
末務而臨時以一理衡量之則所言所行不失其中者鮮矣曲禮曰道德仁義非禮
不成此之謂也是故君子尊德性而道問學致廣大而盡精微極高明而道中庸溫
故而知新敦厚以崇禮

復禮下

聖人之道至平且易也論語記孔子之言備矣但恒言禮未嘗一言及理也記曰道
之不行也我知之矣知者過之愚者不及也道之不明也我知之矣賢者過之不肖
者不及也彼釋氏者流言心性極於幽深微眇適成其為賢知之過聖人之道不
如是也其所以節心者禮焉爾不遠尋夫天地之先也其所以節性者亦禮焉爾不
侈談夫理氣之辨也是故冠昏飲射有事可循也揖讓升降有儀可索也豆蓬鼎俎

有物可稽也使天下之人少而習焉長而安焉其秀者有所憑而入於善頑者有所檢束而不敢為惡上者陶淑而底於成下者亦漸清而可以勉而至聖人之道所以萬世不易者此也聖人之道所以別於異端者亦此也後儒熟聞夫釋氏之言心性極其幽深微眇也往往怖之愧聖人之道以為弗如於是竊取其理事之說而小變之以鑿聖人之遺言曰吾聖人固已有此幽深微眇之一境也復從而闢之曰彼之以心為性不如我之以理為性也嗚呼以是為尊聖人之道而不知適所以小聖人也以是為闢異端而不知陰入於異端也誠如是也吾聖人之於彼教僅如彼教性相之不同而已矣烏足大異乎彼教哉儒釋之互援實始於此矣詩曰鸞飛戾天魚躍於淵說者以為喻惡人遠去民得其所即中庸引而伸之亦不過謂聖人之德明著於天地而已曷嘗有化機也子在川上曰逝者如斯夫不舍晝夜說者以為為感歎時往不可復追即孟子推而極之亦不過謂放乎四海有本者如是而已曷嘗有悟境也蓋聖人之言淺求之其義顯然此所以無過不及為萬世不易之經也深求之流入於幽深微眇則為賢知之過以爭勝於異端而已矣何也聖人之道本乎禮而言者也實有所見也異端之道外乎禮而言者也空無所依也子所雅言詩書執禮顏淵問仁子曰克己復禮為仁請問其目曰非禮勿視非禮勿聽非禮勿言非禮

勿動顏淵曰夫子循循然善誘人博我以文約我以禮聖人舍禮無以為教也賢人舍禮無以為學也詩書博文也執禮約禮也孔子所雅言者也仁者行之盛也孔子所罕言者也顏淵大賢具體而微其問仁與孔子告之為仁者惟禮焉爾仁不能舍禮但求諸理也子貢曰夫子之文章可得而聞也夫子之言行性與天導不可得而聞也文章詩書執禮也性與天導非不可得而聞即具於詩書執禮之中不能託諸空言也夫仁根於性而視聽言動則生於情者也聖人不求諸理而求諸禮蓋求諸理必至於師心求諸禮始可以復性也顏淵見道之高堅前後幾於杳渺而不可憑迨至博文約禮然後曰如有所立卓爾即立於禮之立也故曰不學禮無以立又曰不知禮無以立也其言之明顯如此後儒不察乃舍禮而論立縱極幽深微渺皆釋氏之學非聖學也顏子由學禮而後有所立於是剛而致之其心三月不違仁其所以不違者復其性也其所以復性者復於禮也故曰一日克己復禮天下歸仁焉夫論語聖人之遺書也說聖人之遺書必欲舍其所恆言之禮而事事附會於其所未言之理是果聖人之意邪後儒之學本出於釋氏故謂其言之彌近理而大亂真不知聖學禮也不云理也其道正相反何近而亂真之有哉

金宣宗遷汴論

宣宗貞祐二年四月及蒙古和五月以中都難守謀遷南京徒單鑑諫不從命完顏承暉抹撻盡忠奉太子留守中都遂與六宮啓行至良鄉扈衛亂軍斫答作亂蒙古主曰既和而遷是疑我也乃遣明安援斫答會其兵圍中都宣宗聞變使人召太子七月至南京太子去中都益懼明年蒙古攻破之土地日蹙不二十年金遂以亡論者或謂南遷之舉適足為蒙古用兵之口實此兒童之見也策敵者不問吾所以待之者何如而以和為可恃豈金不南遷而蒙古遂不再至乎重門洞開幸盜不來反咎擊柝者召之母乃愚甚吾則謂當問南遷之失不失不當問蒙古之來不來蘇子之論平王東遷述為賈之言曰我能往寇亦能往王導之言曰北寇方強不可示弱據此二者為平王罪非篤論也何則我能往寇亦能往則遷庶可以逃死不遷則坐而待死矣徒知示弱於寇之為可虞而不知示弱於民之為尤可虞也吾論宣宗南遷之失蓋別有說焉夫兩軍之戰其勝負也不在眾而在有所恃不在力而在作其氣有所恃則無恐作其氣則敢鬪無恐則人心不搖敢鬪則人心思奮今興廢之數雖智者不能預燭其幾而況蚩蚩之情亦安知國之將亡而先生張皇怯懦之心乎顧在上者有以維繫之耳田單之神師陳涉之孤鳴皆所以示之有所恃而作三軍之氣也嗟夫人君之為人心所憑者又豈特神師孤鳴之微而已哉國勢岌岌之

時百計扶持尚恐人心之不固矧在上者以退避率之而能有濟者乎蓋蒙古之破中都也非蒙古破之宣宗自破之也中都之不守也非兵力之不能守宣宗已去人心無所恃而其氣不足以守之也宣宗誠能於當時厲兵秣馬繕城積粟示民以必死使之無恐教之敢鬪敵兵若來背城借一蒙古雖強天下之事未可知也計不出此播遷顛越倉皇南走以汴為家與讐敵鄰僅以區區承暉輔以儲事之盡忠困坐孤城而望其收拾漁散人心效死固守為河南之屏蔽蓋亦難矣乘舟而遇風也不思收帆定柁以待之乃棄舟抱片板汨沒波濤之中冀以達岸有是理乎彼宣宗者抱板者之智也